


柳田文庫
文庫11
D 292
4



文庫 11
D 292
4

宋史卷九

本紀第九

開府儀同三司上柱國錄軍國軍事前中書右丞相監脩國史經筵事都總裁脫等脩
皇明朝列大夫國子監祭酒臣方從哲

承德郎右春坊右中允國子監司業事臣黃汝良等奉

勅重校刊

仁宗一

仁宗體天法道極功全德神文聖武睿哲明孝皇帝諱
禎初名受益真宗第六子母李宸妃也大中祥符三年
四月十四日生章獻皇后無子取為己子養之天性仁
孝寬裕喜愠不形於色七年封慶國公八年封壽春郡

萬曆二十七年刊

宋史卷九

本紀

一

柳田泉文序

010190564180

王講學于資善堂天禧元年兼中書令明年進封昇王
九月丁卯冊爲皇太子以叅知政事李迪兼太子賓客
癸酉謁太廟四年詔五日一開資善堂太子秉笏南鄉
立聽輔臣參決諸司事乾興元年二月戊午眞宗崩遺
詔太子卽皇帝位尊皇后爲皇太后權處分軍國事遣
使告哀契丹己未大赦除常赦所不原者百官進官一
等優賞諸軍山陵諸費毋賦於民庚申命丁謂爲山陵
使出遺留物賜近臣宗室主兵官甲子聽政于崇政殿
西廡乙丑以生日爲乾元節丙寅遣使以先帝遺留物
遺契丹進封涇王元儼爲定王賜贄拜不名以丁謂爲
司徒兼侍中尚書左僕射馮拯爲司空兼侍中樞密使
尚書右僕射曹利用爲尚書左僕射兼侍中戊辰貶道
州司馬寇準爲雷州司戶叅軍尚書戶部侍郎李迪爲
衡州團練副使宣徽南院使曹瑋爲左衛大將軍三月
乙酉作受命寶庚寅初御崇德殿太后設幄次于承明
殿垂簾以見輔臣夏四月壬子遣使以卽位告契丹丙
寅交州來貢五月乙亥錄繫囚雜犯死罪遞降一等杖
以下釋之六月己酉命參知政事王曾按視山陵皇堂
丁巳契丹使來祭奠弔慰庚申入內內侍省押班雷允
恭坐擅移皇堂伏誅丁謂罷爲太子少保分司西京甲

子改命馮拯爲山陵使丙寅降參知政事任中正爲太子賓客秋七月辛未馮拯加昭文館大學士王曾爲中書侍郎同中書門下平章事集賢殿大學士呂夷簡魯宗道參知政事乙亥遣使報謝契丹丙子樞密副使錢惟演爲樞密使戊寅改翼祖定陵爲靖陵辛卯貶丁謂爲崖州司戶參軍八月壬寅遣使賀契丹主及其妻生日正旦乙巳皇太后同御承明殿垂簾決事九月壬申告大行皇帝諡于天地宗廟社稷癸酉上諡冊于延慶殿巳卯命以天書從葬冬十月壬寅契丹使來賀卽位巳酉葬真宗皇帝于永定陵詔中外避皇太后父諱巳未祔真宗神主于太廟廟樂曰大明之舞以莊穆皇后配辛酉降東西京囚罪一等杖以下釋之蠲山陵役戶及靈駕所過民田租十一月丁卯朔錢惟演罷甲戌喚廝囉立遵求內附乙亥以皇太后生日爲長寧節辛巳初御崇政殿西閣講筵命侍講孫奭馮元講論語壬午以張知白爲樞密副使十二月壬戌契丹使來賀明年正旦是歲蘇州水滄州海潮溢詔振卹被水及溺死之家南平王李公蘊遣使進貢

天聖元年春正月丙寅朔改元庚午契丹使初來賀長寧節癸未命三司節浮費遂立計置司戊子以京東淮

南水災遣使安撫辛卯發卒增築京城二月戊戌許
斲羅歲一入貢丁巳奉安太祖太宗御容于南京鴻慶
宮壬戌減諸節齋醮道場三月甲戌奉安真宗御容于
西京應天院丙子詔減西京囚罪一等徒以下釋之賜
城中民八十以上者茶帛仍復其家甲申詔自今營造
三司度實給用辛卯司天監上崇天曆行淮南十三山
場貼射茶法夏四月辛丑罷禮儀院丁未乾元節百官
及契丹使初上壽于崇德殿癸丑詔文武官奏蔭親屬
從本資丁巳詔近臣舉諫官御史各一人五月甲子行
陝西河北入中芻糧見錢法庚午詔禮部貢舉辛未錄
繫囚甲戌命魯宗道按視滑州決河庚寅議皇太后儀
衛制同乘輿六月甲辰罷江寧府溧水縣采丹砂乙卯
禁毀錢鑄鐘秋七月壬申除戎瀘州虛估稅錢詔職田
遇水旱蠲租如例辛巳蠲天下逋負八月乙未募民輸
芟塞滑州決河丙申下德音減天下囚罪一等杖以下
釋之廢鄆州東平馬監以牧地賦民甲寅芝生天安殿
柱九月丙寅馮拯罷以王欽若爲門下侍郎同中書門
下平章事昭文館大學士辛巳詔凡舉官未改轉而坐
贓者舉主免劾庚寅宴崇德殿閏月甲午詔裁造院女
工及營婦配南北作坊者並釋之戊戌寇準卒於雷州

已亥馮拯卒丁未禁彭州九隴縣采金丁巳禁伎術官
求輔臣宗室薦舉冬十月辛酉朔徙陝西緣邊軍馬屯
內地十一月丁酉詔諸州配囚錄具獄與地里上尚書
刑部詳覆禁兩浙江南荆湖福建廣南路巫覡挾邪術
害人者戊午置益州交子務是歲甘沙州來貢涇原咩
迷下杏家族納質內附

二年春二月庚午遣內臣收瘞汴口流屍仍祭奠之三
月丁酉奉安真宗御容于景靈宮奉真殿癸卯王欽若
上真宗實錄是月賜禮部奏名進士諸科及第出身四
百八十五人夏四月辛酉詔三司歲市紬絹非土產者
罷之乙酉錄晉石氏後五月乙未錄繫囚六月壬申罷
天慶天祺天貺先天降聖節宮觀然燈秋七月癸丑奉
安真宗御容于玉清昭應宮安聖殿八月丙辰朔宴崇
德殿初用樂之半詔舉官已遷改而貪汙者舉主以狀
聞聞而不以實者坐之己卯幸國子監謁孔子遂幸武
成王廟甲申太白入太微垣九月辛卯祠太一宮賜道
左耕者茶帛冬十月丙辰奉安真宗御容于洪福院十
一月甲午加上真宗諡乙未朝饗玉清昭應景靈宮丙
申饗太廟丁酉祀天地于園丘大赦百官上尊號曰聖
文睿武仁明孝德皇帝上皇太后尊號曰應元崇德仁

壽慈聖皇太后賜百官諸軍加等乙巳立皇后郭氏辛亥加恩百官十二月庚午詔開封府每歲正旦冬至禁刑三日是歲龜茲甘肅來貢

三年春正月辛卯長寧節近臣及契丹使初上皇太后壽于崇政殿二月戊寅詔陝西災傷州軍盜廩穀傷主者刺配隣州牢城徒減一等夏四月丁丑詔三館繕書藏太清樓五月庚寅錄繫囚癸巳幸御莊觀刈麥聞民舍機杼聲賜織婦茶帛巳亥賜隱士林逋粟帛巳酉禁臣僚奏薦無服子弟六月壬戌太白晝見癸酉環原州屬羗叛寇邊環慶都監趙士隆等死之遣使者安撫陝

西秋七月戊子詔諸路轉運使察舉知州通判不任事者丙午詔邊戶爲羗所擾者蠲租復役二年八月戊午以忠州鹽井歲增課夔州奉節巫山縣舊籍民爲營田萬州戶有稅者歲糴其穀皆爲民害詔悉除之辛未蠲陝西州軍旱災租賦九月乙巳詔司天監奏災異據占書以聞冬十月乙卯太白犯南斗辛酉晏殊爲樞密副使十一月己卯朔罷貼射茶法辛卯以襄州水蠲民租晉降陝解州饑發粟振之戊申王欽若卒十二月癸丑王曾爲門下侍郎昭文館大學士張知白同中書門下平章事集賢殿大學士乙丑張旻爲樞密使戊寅太白

晝見是歲龜茲甘州于闐來貢環慶蕃部嵬逋等內附
補涇原降羌首領潘征爲大將軍主

四年春正月己亥命張得象與流內銓同試百司人庚
子涇原兵破康奴族二月甲寅詔吏犯贓至流按察官
失舉者併劾之庚午置西界和市場三月甲申詔轉運
使提點刑獄罷勸農司己亥鄜延蕃部首領曹守貴等
內附夏四月壬子詔京東西河北淮南平穀價五月己
卯詔禮部貢舉壬午詔大辟疑者奏讞有司毋輒舉駁
戊子錄繫囚己亥詔士有文而行不副者州郡毋得薦
送閏月戊申減江淮歲漕米五十萬石除舒州太湖等

九茶場民通錢十三萬緡己酉詔補大廟室長齋郎辛

亥復陝西永豐渠以通解鹽六月丁亥建劔邵武等州
軍大水詔賜被災家米二石溺死者官瘞之庚寅大雨
震電京師平地水數尺辛卯避正殿減常膳丁酉降天
下囚罪一等徒以下釋之畿內京東西淮南河北被水
民田蠲其租癸卯詔官物漂失主典免償流徙者所在
撫存之秋七月戊申御長春殿復常膳辛未減兩川歲
輸錦綺易綾紗爲絹以給邊費壬申詔諸路轉運使舉
所部官通經術者八月丁亥築秦州捍海堰己丑詔施
州溪峒首領三年一至京師九月乙卯詔孫奭馮元舉

京朝官通經術者庚申詔禮部貢院諸科通三經者薦擢之錄周世宗從孫柴元亨爲三班奉職辛未廢襄唐州營田務以田賦民冬十月甲戌朔日有食之壬辰詔郎中以上致仕賜一子官甲午昏霧四塞丙申奉安眞宗御容于鴻慶宮十二月丁丑發米六十萬斛貸畿內饑丁亥帝白太后欲元日先上太后壽乃受朝太后不可王曾奏曰陛下以孝奉母儀太后以謙全國體請如太后令

五年春正月壬寅朔初率百官上皇太后壽于會慶殿遂御天安殿受朝己未晏殊罷戊辰以夏竦爲樞密副使二月癸酉命呂夷簡夏竦脩先朝國史王曾提舉丙子詔振京東流民丁丑西域僧法吉祥等來獻梵書三月戊申賜禮部奏名進士諸科及第出身一千七十六人秦州地震罷瓊州歲貢瑋瑁龜皮紫貝夏四月壬辰壽寧觀火五月庚子朔詔武臣子孫習文藝者聽奏文資壬寅太白晝見丙午閱諸班騎射辛亥錄繫囚辛酉命呂夷簡等詳定編敕癸亥楚王元佐薨是月京畿旱磁州蟲食桑六月甲戌禱雨于玉清昭應宮開寶寺丙子詔決畿內繫囚丁丑雨癸未罷諸營造之不急者秋七月己亥朔振秦州水災賜被溺家錢米丙辰發丁夫

三萬八千卒二萬一千緡錢五十萬塞滑州決河詔察
京東被災縣吏不職者以聞九月庚戌闕龍衛神勇軍
習戰冬十月辛未罷陝西青苗錢癸酉奉安真宗御容
于慈孝寺崇真殿己丑頒新定五服敕甲午同皇太后
幸御書院觀太宗真宗御書乙未詔西州廣南在官物
故者遣人護送其家屬還鄉官爲給食丙申滑州言河
平十一月丁酉朔以陝西旱蝗減其民租賦庚子遣使
河北體量安撫壬寅復作指南車辛亥朝饗景靈宮壬
子饗太廟癸丑祀天地于園丘大赦賀皇太后于會慶
殿丁巳恭謝玉清昭應宮十二月辛未加恩百官甲戌
詔輔臣南郊恩例外更改一子官丁亥詔百官宗室受
賂冒爲親屬奏官者毋赦是歲甘州及南平國王李公
蘊遣人來貢京兆府邢洺州蝗華州旱好蚘蟲食苗
六年春正月己酉罷兩川乾元節歲貢織佛戊午罷提
點刑獄二月庚辰大風晝晦壬午張知白薨三月丙申
朔日有食之壬子以張士遜同中書門下平章事集賢
殿大學士癸丑以姜遵爲樞密副使己未以范雍爲樞
密副使壬戌作西太一宮夏四月戊辰詔審官三班院
吏部流內銓軍頭司各引對所理公事自帝爲皇太子
輔臣參決諸司事于資善堂至是始還有司丁丑貸河

北流民復業者種食復是年租賦癸未命官減三司歲
調上供物甲申旦有星大如斗自北流至西南光燭地
有聲如雷庚寅下德音以星變齋居不視事五日降畿
內囚死罪流以下釋之罷諸土木工振河北流民過京
師者五月乙未朔衣陟寇邊六月丙寅罷戎瀘諸州穀
稅錢秋七月壬子江寧府楊真潤州江水溢壞官民廬
舍遣使安撫振卹八月乙丑詔免河北水災州軍秋稅
乙亥河決澶州王楚埽丙戌錄唐張九齡後九月己亥
詔京朝官任內五人同罪奏舉者減一任癸卯祠西
太一宮甲辰詔河北災傷民質桑土與人者悉歸之候
歲豐償所貸乙巳遣使脩諸路兵械冬十月甲申除福
州民逋官莊錢十二萬八千緡十一月戊午京西言穀
斗十錢十二月癸亥祠西太一宮是歲甘州三佛齊來
貢

七年春正月癸卯曹利用罷丙辰降利用爲左千牛衛
上將軍二月庚申朔魯宗道卒甲子詔文臣歷邊有材
勇武臣之子有節義者與換官三路任使丙寅張士遜
罷以呂夷簡同中書門下平章事集賢殿大學士丁卯
以夏竦薛奎參知政事陳堯佐爲樞密副使癸酉貶曹
利用爲崇信軍節度副使房州安置未至自殺乙酉以

河北水災委轉運使察官吏不任職者易之癸巳募民入粟以振河北閏月戊申禁京城剏造寺觀壬子復制舉六科增高蹈丘園沉淪草澤茂才異等科置書判拔萃科及試武舉癸酉置理檢使以御史中丞爲之三月乙丑詔吏胥受賕毋用蔭辛巳詔契丹饑民所過給米分送唐鄧等州以間田處之癸未詔百官轉對極言時政闕失在外者實封以聞夏四月庚寅赦天下免河北被水民租賦辛卯南平王李公蘊卒其子德政遣人來告以爲交趾郡王五月乙未朔詔禮部貢舉庚申詔戒文弊巳巳頒新令庚午詔先朝文武官自刺史少卿監

以上並錄其後癸酉錄繫囚庚辰御承明殿臣僚請對者十九人日昃乃罷六月壬辰置益梓廣南路轉運判官丁未大雷雨玉清昭應宮災甲寅王曾罷秋七月癸亥以玉清昭應宮災遣官告諸陵詔天下不復繕脩乙亥詔殿直以上毋得換文資乙酉罷諸宮觀使八月丁亥朔日有食之詔罷天下職田官收其入以所直均給之巳丑以呂夷簡爲昭文館大學士辛卯夏竦復爲樞密副使陳堯佐王曙並參知政事巳亥詔命官犯正入賊毋使親民冬十月壬寅閱虎翼武騎卒習戰丙午京師地震詔知州軍歲舉判司簿尉可縣令者一人十一

月癸亥冬至率百官上皇太后壽于會慶殿遂御天安殿受朝庚午詔天下孤獨疾病者致醫藥存視詔周世宗後凡經郊祀錄其子孫一人是歲河北水遣使決囚振貧瘞溺死者給其家緡錢察官吏貪暴不恤民者龜茲下溪州黔州蠻來貢

八年春正月甲戌曹瑋卒辛巳作會聖宮于西京永安縣二月戊子詔五代時官三品以上告身存者子孫聽用蔭三月壬申幸後苑遂宴太清樓乙亥禁以財冒士族娶宗室女者詔河北被水州縣毋稅牛是月賜禮部奏名進士諸科及第出身八百二十二人五月甲寅賜

信州龍虎山張乾耀號澄素先生丙辰大雨雹辛酉錄

繫囚六月癸巳呂夷簡上新脩國史巳亥詔御史臺獄勿關糾察司乙巳親試書判拔萃科及武舉人秋七月丙子策制舉人八月丙戌詔詳定鹽法丁亥詔近臣宗室觀祖宗御書于龍圖天章閣又觀瑞穀于元真殿遂宴藻珠殿戊子詔流配人道死者其妻子給食送還鄉里九月癸丑復置諸路提點刑獄官丙辰罷轉對乙丑姜遵卒巳巳以趙禎爲樞密副使冬十月壬辰奉安太祖御容于太平興國寺開先殿丙申弛三京河中府潁許汝鄭鄆濟衛晉絳虢亳宿等二十八州軍鹽禁壬寅

置天章閣待制十一月丙寅朝饗景靈宮丁卯饗太廟
戊辰祀大地于園丘大赦賀皇太后于會慶殿十二月
癸未加恩百官辛丑西平王趙德明交趾王李德政並
加賜功臣是歲高麗占城中部川都蠻來貢

九年春正月辛亥詔諸路轉運判官員外郎以上遇郊
聽任子弟丙辰長寧節百官初上皇太后壽于會慶殿
辛未減畿內民租二月癸巳詔復郡縣職田三月甲寅
奉安太祖太宗真宗御容于會聖宮夏四月戊寅詔以
隴州論平民五人爲劫盜抵死主者雖更赦並從重罰
乙巳闕大樂五月乙丑錄繫囚六月庚辰宋綬上皇太后

后儀制秋七月丙午朔契丹使來告其主隆緒殂遣使

祭奠弔慰及賀宋真立九月癸亥祠西太一宮賜道左
耕者茶帛冬十月丙戌詔公卿大夫勵名節乙未詔常
參官已授外任毋得奏舉選人辛丑罷益梓廣南路轉
運判官閏月戊辰翰林侍讀學士孫奭請老命知兗州
曲宴太清樓送之十一月丁亥弛兩川禁禁已丑祈雪
于會靈觀丁酉出知雜御史曹脩古御史郭勸楊偕推
直官段少連十二月甲寅詔吏部銓選人父母年八十
以上者權注近官辛酉大風三日是歲契丹主及其國
母遣使來致遺留物及謝弔祭南平王李德政遣人謝

加恩龜茲沙州來貢女真晏端等百八十四人內附

宋史卷之十

本紀第十

開府儀同三司上柱國錄軍國重事前書右丞相監脩國史領經筵事都總裁脫脫等脩
皇明朝列大夫國子監祭酒臣方從哲

承德郎右春坊左管國子監司業事左黃汝良等奉

勅重校刊

仁宗二

明道元年春二月癸卯呂夷簡上三朝寶訓丙午詔仕
廣南者毋過兩任以防貪黷庚戌以張士遜同中書門
下平章事集賢殿大學士戊午錄故宰臣孫並試將作
監主簿甲子詔員外郎以上致仕者錄其子校書郎三

萬曆二十七年刊

宋史卷十

本紀

十

丞以上齋郎丁卯以真宗順容李氏爲宸妃是日妃薨
三月戊子頒天聖編敕戊戌以江淮旱遣使與長吏錄
繫囚流以下減一等杖笞釋之己亥除婺秀州丁身錢
夏四月丙午錄繫囚戊午知棟州王涉坐冒請官地爲
職田配廣南牢城五月癸酉遣使點檢河北城池器甲
密訪官吏能否壬午廢杭秀二州鹽場秋七月丙申詔
諸路轉運使舉國子監講官丁酉王曙罷太白晝見彌
月乃滅八月辛丑以晏殊爲樞密副使丙午晏殊參知
政事甲寅以楊崇勛爲樞密副使辛酉授唃廝囉爲寧
遠大將軍愛州團練使壬戌大內火延八殿癸亥移御
延福宮甲子以呂夷簡爲脩內使乙丑詔羣臣直言闕
失丁卯大赦九月庚寅重作受命寶丙申皇太后出金
銀器易左藏緡錢二十萬以助脩內冬十月庚子黃白
氣五貫紫微垣丁巳詔漢陽軍發廩粟以振飢民十一
月甲戌以脩內成恭謝天地于大安殿謁太廟大赦改
元百官進秩優賞諸軍是日還宮己卯冬至率百官賀
皇太后于文德殿御大安殿受朝壬辰延州言夏王趙
德明卒癸巳以德明子元昊爲定難軍節度使西平王
十二月壬寅以楊崇勛爲樞密使戊午詔獲劫盜者奏
裁毋擅殺壬戌西北有蒼白氣亘天是歲京東淮南江

東饑

二年春正月己卯詔發運使以工供水百萬斛振江淮
饑民遣使督視二月戊戌合魯星見東北方庚子詔江
淮民饑死者官爲之葬祭乙巳皇太后服袞衣儀天冠
饗太廟皇太妃亞獻皇后終獻是日上皇太后尊號曰
應元齊聖顯功崇德慈仁保壽皇太后丁未祀先農于
東郊躬耕籍田大赦百官上尊號曰睿聖文武體天法
道仁明孝德皇帝三月庚午加恩百官丁亥祈雨于會
靈觀上清宮景德開寶寺庚寅以皇太后不豫大赦除
常赦所不原者乾興以來貶死者復官謫者內徙甲午
皇太后崩遺詔尊皇太妃爲皇太后呂夷簡爲山陵使
夏四月丙申朔出大行皇太后遺留物賜近臣壬寅追
尊宸妃李氏爲皇太后至是帝始知爲宸妃所生甲辰
以大行皇太后五使並兼追尊皇太后園陵使戊申聽
政于崇政殿西廂己酉罷乾元節上壽壬子詔臣僚宗
戚命婦毋得以進獻祈恩澤及緣親戚通表章罷創脩
寺觀帝始親政裁抑僥倖中外大悅癸丑召還宋綬范
仲淹丙辰內侍江德明等並坐交通請謁黜己未呂夷
簡張耆夏竦陳堯佐范雍趙稹晏殊皆罷以張士遜爲
昭文館大學士李迪同中書門下平章事集賢殿大學

士王隨參知政事李諮爲樞密副使王德用僉書樞密院事壬戌御紫宸殿以張士遜爲山陵使兼園陵使癸亥上大行太后諡曰莊獻明肅追尊宸妃李氏爲皇太后諡曰莊懿五月戊辰詔禮部貢舉癸酉詔中外勿輒言皇太后垂簾日事乙亥罷羣牧制置使丙子命宰臣張士遜撰謝太廟及躬耕籍田記戊寅錄繫囚六月甲午謁廟非後世法乃止撰籍田記元劉鋹後癸卯命審刑大理詳定配隸刑名戊午減天下歲貢物秋七月丁丑詔知耀州富平縣事張龜年曾秩再任以其治行風告天下戊子詔以蝗旱去尊號睿聖文武四字以告天地宗廟仍令中外直言闕政八月甲午朔契丹使來弔慰祭奠壬寅作奉慈廟甲辰詔中外毋避莊獻明肅太后父諱丁巳置端明殿學士九月甲戌幸法福院臨莊懿太后梓宮丙子壬午臨如之冬十月癸巳朔太白犯南斗甲午禁登州民采金丁酉禘葬莊獻明肅皇太后莊懿皇太后于永定陵甲辰詔以兩川歲貢綾錦羅綺紗以三之二易爲紬絹供軍須已酉禘莊獻明肅太后莊懿太后神主于奉慈廟癸丑下德音降東西京囚罪一等徒以下釋之緣二太后陵應

奉民戶免租賦科役有差丙辰贈周王祐爲皇太子戊午張士遜楊崇勛罷以呂夷簡爲門下侍郎同中書門下平章事昭文館大學士王曙爲樞密使王德用爲樞密副使宋綬參知政事蔡齊爲樞密副使十一月癸亥朔薛奎罷詔增宗室奉太白犯南斗乙丑追冊美人張氏爲皇后甲戌贈寇準爲中書令十二月丙申復置提點刑獄丁酉詔諸路轉運使副歲徧歷所部仍令州軍具所至月日以聞甲辰以京東饑出內藏絹二十萬代其民歲輸乙巳詔脩周廟丁未詔臺官非中丞知雜保薦者勿任戊申出宮人二百乙卯廢皇后郭氏爲淨妃

王京冲妙仙師居長寧宮御史中丞孔道輔率諫官御史大呼殿門請對詔宰相告以皇后當廢狀丙辰出道輔及諫官范仲淹仍詔臺諫自今毋相率請對丁巳詔明年改元禁邊臣增置堡砦是歲畿內京東西河北河東陝西蝗淮南江東兩川饑遣使安撫除民租注輦國來貢

景祐元年春正月甲子發江淮漕米振京東饑民丙寅詔開封府界諸縣作糜粥以濟饑民諸災傷州軍亦如之戊辰詔三司鑄景祐元寶錢甲戌詔執政大臣議兵農可更制者以聞詔募民掘蝗種給菽米癸未詔禮部

所試舉人十取其二進士三舉諸科五舉嘗經殿試進士五舉年五十諸科六舉年六十及曾經先朝御試者皆以名聞甲申淮南饑出內藏絹二十萬代其民歲輸丁亥置崇政殿說書庚寅詔停淮南上供一年二月乙未罷書判拔萃科辛丑詔禮部貢院諸科舉人七舉者不限年並許特奏名甲辰權減江淮漕米二百萬石戊申詔麟府州振蕃漢饑民三月壬午免諸路災傷州軍今年夏稅癸未詔解州畦戶逋鹽蠲其半是月賜禮部奏名進士諸科及第出身七百八十三人夏四月丁酉開封府判官龐籍言尚美人遣內侍稱教旨免工人市租帝爲杖內侍仍詔有司自今宮中傳命毋得輒受癸丑詔置殿中侍御史監察御史裏行五月辛酉出布十萬端易錢糴河北軍儲丁卯禁民間織錦刺繡爲服飾西川歲織錦上供亦罷之癸酉詔臺諫未曾歷郡守者與郡壬午錄繫囚是月契丹主宗真之母還政於子出居慶陵六月壬辰交州民六百餘人內附庚子免畿內被災民稅之半巳酉策制舉武舉人乙卯詔州縣官非理科決罪人至死者並奏聽裁閏月甲子泗州淮汴溢巳巳常州無錫縣大風發屋乙亥毀天下無額寺院壬午罷造玳瑁龜筒器秋七月丙申賜壽州下蔡縣被溺

之家錢有差已亥樞密使王曙加同平章事辛丑詔文武提刑毋得互相薦論壬子詔轉運使與長吏舉所部官專領常平倉粟甲寅河決澶州橫隴埽八月庚申薛奎卒壬戌有星孛于張翼癸亥王曙卒甲子月犯南斗戊辰帝不豫庚午以王曾爲樞密使辛未以星變大赦避正殿減常膳輔臣奏事延和殿閣壬辰詔淨妃郭氏出居于外美人尚氏入道楊氏安置別宅九月壬辰百官請隻日御前殿如先帝故事詔可丁酉帝康復御正殿復常膳甲辰詔立皇后曹氏丙午癸惑犯南斗冬十月庚申罷淮南江浙荆湖制置發運使詔淮南轉運兼發運事乙亥作郊廟景安興安肅安之曲十一月己丑冊曹氏爲皇后癸丑作大安之曲以饗聖祖十二月癸酉賜西平王趙元昊佛經是歲南平王李德政獻馴象二詔還之開封府淄州蝗

二年春正月癸丑置邇英延義二閣寫尚書無逸篇于屏二月戊午御延福宮觀大樂癸亥舊給事資善堂者皆推恩戊辰李迪罷以王曾爲門下侍郎同中書門下平章事集賢殿大學士王隨李諮知樞密院事蔡齊盛度參知政事王德用韓億同知樞密院事三月戊申出內庫珠賜三司以助經費夏四月庚午詔天下有知樂

者所在薦聞五月甲午猺獠寇雷化州詔桂廣會兵討之丙申錄繫囚庚子議太祖太宗真宗廟並萬世不遷南郊升脩上帝以太祖定配二宗迭配丙午降天下繫囚罪一等杖以下釋之丁未廣西言鎮寧州蠻入寇六月丁巳詔募職官初任未成考毋薦乙亥頒一司一務及在京敕鎮寧蠻請降秋七月戊申廢西京採柴務以山林賦民官取十之一八月壬子朔詔輕強盜法甲寅宴紫宸殿初用樂甲戌幸安肅門砲塲閱習戰已卯置提點刑獄鑄錢官九月壬寅按新樂巴西作睦親宅命中丞杜衍等汰三司胥吏宋綬上中書總例冬十月辛亥朔復置朝集院癸亥復羣牧制置使丁卯詔諸路歲輸緡錢福建二廣易以銀江東以帛庚午熒惑犯左執法十一月戊子廢后郭氏薨癸巳朝饗景靈宮甲午饗太廟奉慈廟乙未祀天地于圜丘大赦錄五代及諸國後宗室任諸司使以下至殿直者換西班牙官百官上尊號曰景祐體天法道欽文聰武聖神孝德皇帝丁未加恩百官十二月壬子加唃廝囉爲保順軍留後丙子詔長吏能導民脩水利闢荒田者賞之是歲以鎮戎軍荐饑貸弓箭手粟麥六萬石

三年春正月壬辰追復郭氏爲皇后丁酉葬皇后郭氏

二月丙辰命官較太常鐘律壬戌詔兩制禮官詳定京師士民服用居室之制甲子以廣南兵民苦瘴毒爲置醫藥丁卯脩陝西三白渠三月癸巳復商賈以見錢算請官茶法乙未觀新定鐘律戊戌詔兩省卿監刺史閣門以上致仕給奉如分司官長吏歲時勞賜之改維州爲威州夏五月庚辰購求館閣逸書丙申錄繫囚丙戌天章閣待制范仲淹坐譏刺大臣落職知饒州集賢校理余靖館閣校勘尹洙歐陽脩並落職補外詔戒百官越職言事六月壬申虔吉州水溢壞城郭廬舍賜被溺家錢有差秋七月丁亥禁民間私寫編敕刑書乙未置太宗正司庚子大雨震電太平興國寺災辛丑降三京罪囚一等徒以下釋之八月己酉班民間冠服居室車馬器用犯制之禁乙卯月犯南斗九月庚辰幸睦親宅宴宗室癸巳熒惑犯南斗是月定申心喪解官法冬十月丁未命章得象等考課諸路提刑甲寅作朝集院十一月戊寅保慶皇太后楊氏崩辛卯上保慶太后諡曰莊惠十二月丙寅李諮卒丁卯王德用知樞密院事章得象同知樞密院事是歲南平王李德政西南蕃來貢南丹州莫淮戟內附

四年春正月壬午詔均諸州解額二月己酉葬莊惠皇

后于永定陵己未祔神主于奉慈廟庚申德音降東西
京及靈駕所過州縣囚罪一等徒以下釋之乙丑置赤
帝像于宮中祈嗣三月甲戌置天章閣侍講戊寅詔禮
部貢舉夏四月乙巳呂夷簡上景祐法寶新錄甲子呂
夷簡王曾宋綬蔡齊罷以王隨爲門下侍郎同中書門
下平章事昭文館大學士陳堯佐同中書門下平章事
集賢殿大學士盛度知樞密院事韓億程琳石中立參
知政事王巖同知樞密院事五月庚戌皇子生錄繫囚
降死罪一等流以下釋之是日皇子薨乙卯以旱遣使
決三京繫囚丙寅芝生化成殿楹六月乙亥杭州江湖
壞隄遣使致祭戊子出神武祕略賜邊臣己丑奉安太
祖御容于揚州建隆寺秋七月丁未詔河東河北州郡
密嚴邊備戊申有星數百西南流至壁東大者其光燭
地黑氣長丈餘出畢宿下八月甲戌越州水賜被溺民
家錢有差甲午詔三司轉運司毋借常平錢穀冬十一
月癸亥罷登萊買金場十二月甲申并代忻州並言地
震吏民壓死者三萬二千三百六人傷五千六百人畜
擾死者五萬餘遣使撫存其民賜死傷之家錢有差是
歲滑州民蠶成被長二丈五尺响嘶囉龜茲沙州來貢
寶元元年春正月甲辰雷丙辰以地震及雷發不時詔

轉運使提舉刑獄按所部官吏除并代忻州壓死民家
去年秋糧二月壬申詔復日御前殿甲午安化蠻寇宜
融州三月戊戌朔王隨陳堯佐韓億石中立罷以張士
遜爲門下侍郎同中書門下平章事昭文館大學士章
得象同中書門下平章事集賢殿大學士王巖李若谷
並參知政事王博文陳執中同知樞密院事己亥發邵
澧潭三州駐泊兵討安化州蠻是月賜禮部奏名進士
諸科及第出身七百二十四人夏四月癸酉王博文卒
乙亥以張觀同知樞密院事壬辰除宜融州夏稅五月
乙巳錄繫囚六月戊寅罷舉童子己卯建州大水壞民

廬舍賜死傷家錢有差其無主者官葬祭之甲申詔天
下諸州月上雨雪狀秋七月壬戌策制舉人癸亥策武
舉人八月丁卯復淮南江浙荆湖制置發運使庚辰熒
惑犯南斗九月戊申詔應祀事已受誓戒而失虔恭者
毋以赦原賜宜融州討蠻兵緡錢冬十月丙寅詔戒百
官朋黨十一月甲辰詔廣西鈐轄進兵討安化蠻乙巳
詔宜融州民嘗從軍役者免今夏稅運糧者免其半戊
申朝饗景靈宮己酉饗太廟及奉慈廟庚戌祀天地于
圜丘大赦改元百官上尊號曰寶元體天法道欽文聰
武聖神孝德皇帝乙卯復奏舉縣令法王曾薨十二月

癸亥朔加恩百官甲子京師地震丙寅鄜延路言趙元
昊反甲戌禁邊人與元昊互市己卯奉寧軍節度使知
永興軍夏竦兼涇原秦鳳路安撫使振武軍節度使知
延州范雍兼鄜延環慶路安撫使是歲達州大水黎州
蠻來貢

二年春正月己酉王隨卒辛亥安化蠻平癸丑趙元昊
表請稱帝改元三月丁未鑄皇宋通寶錢乙卯闕試衛
士戊午賜陝西緣邊軍士緡錢夏四月癸亥授喚廝囉
二子瞎囉磨角囉團練使乙丑放宮女二百七十人壬
申免昭州運糧死蠻寇者家徭二年賦租一年丁亥募

河東陝西民入粟實邊五月癸巳詔近臣舉方略材武
之士各二人己亥禁皇族及諸命婦女冠尼等非時入
內癸卯命近臣同三司議節省浮費丙午遣使體量安
撫陝西河東己酉錄繫囚壬子王德用罷以夏守贊知
樞密院事六月壬戌詔省浮費自乘輿服御及宮掖所
須宜從簡約若吏兵祿賜毋槩行裁減戊辰詔諸致仕
官嘗犯贓者毋推恩子孫丁丑益州火焚廬舍三千餘
區壬午削趙元昊官爵除屬籍秋七月丁巳詔宗室遇
南郊及乾元節恩許官一子餘五歲授官戊午以夏竦
知涇州兼涇原秦鳳路沿邊經略安撫使涇原路馬步

軍都總管范雍兼鄜延環慶路沿邊經略安撫使鄜延
路馬步軍都總管八月丁卯以篳篥城哨廝波補本族
軍主甲戌皇子生丙子降三京囚罪一等徒以下釋之
辛巳命輔臣報祠高禩九月壬寅詔河北轉運使兼都
大制置營田屯田事乙卯出內庫銀四萬兩易粟振益
梓利夔路饑民十月庚午賜麟府州及川陝軍士緡錢
甲申詔兩川饑民出劔門關者勿禁十一月戊子朔出
內庫珠易緡錢三十萬羅邊儲丁酉盛度程琳罷出御
史中丞孔道輔壬寅以王巖知樞密院事宋庠參知政
事十二月庚申詔審刑院大理寺刑部毋通賓客壬申
詔御史關員朕自擇舉是歲曹濮單州蝗

康定元年春正月丙辰朔日有食之壬戌賜國子監學
田五十頃是月元昊寇延州執鄜延環慶兩路副都總
管劉平鄜延副都總管石元孫詔陝西運使明鎬募強
壯備邊二月丁亥以夏守贇爲宣徽南院使陝西馬步
軍都總管經略安撫使詔潼關設備辛卯月太白俱犯
昴壬辰夏守贇兼沿邊招討使出內藏緡錢十萬賜戍
邊禁兵之家知制誥韓琦安撫陝西白氣如繩貫日甲
午括畿內京東西淮南陝西馬丙申詔諸路轉運使提
刑訪知邊事者以聞丁酉詔樞密院同宰臣議邊事辛

丑出內藏緡錢八十萬陝西市糴軍儲丙午德音釋延州保安軍流以下罪寇所攻掠地除令夏稅戍兵及戰死者賜其家緡錢是日改元去尊號寶元字許中外臣庶上封章言事丁未詔陝西量民力蠲所科芻糧癸丑降范雍爲尚書吏部侍郎知安州甲寅出內庫珠償民馬直三月丙辰詔大臣條陝西攻守策癸亥命韓琦治陝西城池乙丑閱虎翼軍習戰辛未詔延州錄戰沒軍士子孫月給糧丙子大風晝冥是夜有黑氣長數丈見東南丁丑罷大宴詔中外言闕政戊寅王醜陳執中張觀罷以晏殊宋綬知樞密院事王貽永同知樞密院事詔按察官舉才堪將帥者庚辰詔參知政事同議邊事辛巳德音降天下囚罪一等徒以下釋之賜京師河北陝西河東諸軍緡錢蠲陝西夏稅十之二減河東所科粟夏四月丙戌省陝西沿邊堡砦癸巳詔諸戍邊軍月遣內侍存問其家病致醫藥死爲斂葬之甲午遣使籍陝西強壯軍乙未契丹國母復遣使來賀乾元節乙巳增補河北強壯軍丙午鄜延路兵馬都監黃德和坐棄軍要斬丁未贈劉平石元孫官錄其子孫辛亥築延州金明栲栳砦五月甲寅朔詔前殿奏事毋過五班餘對後殿命大官賜食壬戌張士遜致事呂夷簡爲門下侍

郎同中書門下平章事昭文館大學士癸酉詔夏守贊
進屯鄜州戊寅以夏竦爲陝西馬步軍都總管兼招討
使是月元昊陷塞門砦兵馬監押王繼元死之又陷安
遠砦六月丙戌詔假日御崇政殿視事如前殿丁亥以
夏守贊同知樞密院事甲午降三京囚罪一等徒以下
釋之乙未南京鴻慶宮神御殿火壬寅遣使體量安撫
京東西甲辰增置陝西河北河東京東西弓手秋七月
乙丑遣使以討元昊告契丹庚午閱諸軍習戰戊寅皇
子昕爲忠正軍節度使封壽岡公八月戊戌禁以金箔
飾佛像癸卯遣尚書屯田員外郎劉渙使邈川戊申夏
守贊罷以杜衍同知樞密院事辛亥詔范仲淹爲
領兵驅逐塞門等砦蕃騎出境仍募弓箭手給地居之
九月甲寅滑州河溢戊午李若谷罷以宋綬昇宗慤參
知政事鄭戩同知樞密院事戊辰以晏殊爲樞密使王
貽永杜衍鄭戩並樞密副使甲戌詔使臣諸班諸軍有
武藝者自陳辛巳閱諸軍習戰是月元昊寇三川砦都
巡檢楊保吉死之又圍師子定川堡戰士死者五千餘
人遂陷乾溝乾河趙福三堡環慶路兵馬副都總管任
福破白豹城冬十月乙未製銅木契傳信牌甲辰錄方
略士六十一人授官有差十一月壬戌有大星流西南

聲如雷者三十二月癸未出內藏庫絹一百萬助羅軍
儲詔南京祠大火丙戌詔以常平緡錢助羅軍儲癸卯
校卒戊申鑄當十錢權助邊費

宋史卷十一

本紀第十一

開府儀同三司上柱國鎮軍將軍前中書右丞相樞密使領經筵事都總裁脫脫等脩

皇明朝列大夫國子監祭酒臣方從哲

承德郎右中書國子監書事臣黃汝良等奉

勅重校刊

仁宗三

慶曆元年春正月辛亥朔御大慶殿受朝己未加喞廝
囉河西節度使壬申詔歲以春分祠高禩是月元昊請
和二月己亥壽國公昕薨辛亥罷大宴京東西淮浙江
南荆湖置宣毅軍甲辰詔臣僚受外任者毋得因臨遣

新恩丙午京師雨彘是月元昊寇渭州環慶路馬步軍副總管任福敗于好水川福及將佐軍士死者六千餘人三月庚戌朔脩金隄乙卯詔止郡國舉人勿以邊機爲名希求恩澤夏四月甲申以資政殿學士陳執中同陝西馬步軍都總管兼經略安撫沿邊招討等使知永興軍詔夏竦仍判永興軍乙巳下德音降陝西囚死罪一等流以下釋之特支軍士緡錢振撫邊民被鈔略者親屬五月丁巳錄繫囚甲子出內藏緡錢一百萬助軍費乙丑追封皇長子爲褒王賜名昉丁卯罷陝西經略安撫沿邊招討都監辛未宋庠鄭戩罷以王舉正參知政事任中師任布爲樞密副使詔夏竦屯軍鄜州陳執中屯軍涇州癸酉閱試衛士六月壬辰詔陝西諸路總管司嚴邊備毋輒入賊界賊至則禦之乙巳詔近臣舉河北陝西河東知州通判縣令秋七月丙辰月掩心後星戊午月掩南斗壬戌置萬勝軍凡二十指揮是月元昊寇麟府州八月戊寅詔鄜延部署以兵援麟府甲申河北置場括市戰馬緣邊七州軍免括乙未毀潼關新置樓櫓庚子月掩歲星乙巳募民間材勇者補神捷指揮是月元昊寇金明砦破寧遠砦砦主王世亶兵馬監押王顯死之陷豐州知州王餘慶兵馬監押孫吉死之

九月壬子命河東鑄大鐵錢乙亥復置義倉冬十月甲午詔罷都部署分四路置使置陝西營田務己亥罷銅符木契是月脩河北城池十一月壬子置涇原路強壯弓箭手丙辰發廩粟減價以濟京城民甲子朝饗景靈宮乙丑饗太廟奉慈廟丙寅祀天地于園丘大赦改元蠲陝西來年夏稅十之二及麟府民二年賦租臣僚許立家廟功臣不限品數賜戟增天下解額弛京東八州鹽禁是月令江饒池三州鑄鐵錢十二月丙子加恩百官丁丑司天監上崇天萬年曆戊寅詔陝西四路總管及轉運使兼營田甲午置陝西護塞軍是歲湖南洞蠻知徽州楊通漢貢方物

二年春三月丁巳復京師榷鹽法壬戌詔以京西閒田處內附蕃族無親屬者遣使河北募兵及萬人者賞之癸亥詔磨勘院考提點刑獄功罪爲三等以待黜陟二月乙未詔河北強壯刺手背爲義勇軍三月甲辰朔詔殿前指揮使兩省都知舉武臣才堪爲將者丁巳杜衍宣撫河東辛酉晁宗慤罷己巳契丹遣蕭英劉六符來致書求割地是月賜禮部奏名進士諸科及第出身八百三十九人夏四月戊寅命御史中丞諫官同較三司用度罷其不急者庚辰知制誥富弼報使契丹五月辛

亥錄繫囚壬子減皇后及宗室婦郊賜之半甲寅詔三
館臣僚上封事及聽請對丙辰詔醫官毋得換右職戊
午建六名府爲北京降河北州軍繫囚罪一等杖笞以
下釋之乙丑罷左藏庫月進錢戊辰禁銷金爲服飾是
月契丹集兵幽州聲言來侵河北京東皆爲邊備六月
甲戌出內藏銀紬絹三百萬助邊費癸未以特奏名武
藝人補三班丙戌置北平軍丙申閱蕃落將士騎射戊
戌詔減省南郊臣僚賜與秋七月丙午任布罷丁未詔
軍校戰沒無子孫者賜其家緡錢戊午大雨雹以呂夷
簡兼判樞密院事章得象兼樞密使晏殊加平章事癸
亥富弼再使契丹詔京官告病者一年方聽朝參八月
丁丑策制舉人戊寅策武舉人試騎射甲申白氣貫北
斗戊子出內藏庫緡錢十萬脩北京行宮己亥遣使安
撫京東督捕盜賊九月丙午呂夷簡改兼樞密使乙丑
契丹遣耶律仁起劉六符持誓書來閏月戊戌罷河北
民間科徭是月元昊寇定川砦涇原路馬步軍副都總
管葛懷敏戰沒諸將死者十四人元昊大掠渭州而去
冬十月庚戌敕陝西保捷軍甲寅遣使安撫涇原路丙
辰知制誥梁適報使契丹戊午發定州禁軍二萬二千
人屯涇原庚申詔恤將校陣亡其妻女無依者養之宮

中丙寅契丹遣使來再致誓書報徹兵十一月壬申黑
氣貫北斗柄辛巳復都部署兼招討等使命韓琦范仲
淹龐籍分領之甲申以泰山處士孫復爲國子監直講
是歲占城獻馴象三

三年春正月庚午朔封皇子曦爲鄂王辛未曦薨丙子
減陝西歲市木三之一辛巳詔輔臣議蠲減天下賦役
戊子詔錄將校死王事而無子孫者親屬辛卯置德順
軍壬辰錄唐狄仁傑後癸巳元昊自名曩霄遣人來納
款稱夏國二月丙午賜陝西招討韓琦范仲淹龐籍錢
各百萬辛酉立四門學三月壬申闕衛士武技戊子呂

夷簡罷爲司徒監脩國史與議軍國大事以章得象爲

昭文館大學士晏殊爲集賢殿大學士並兼樞密使夏
竦爲樞密使賈昌朝叅知政事夏四月戊戌朔幸瓊林
苑閱騎士癸卯遣保安軍判官邵良佐使元昊許封冊
爲夏國主歲賜絹十萬匹茶三萬斤甲辰以韓琦范仲
淹爲樞密副使乙巳詔夏竦還本鎮以杜衍爲樞密使
丙辰以春夏不雨遣使祠禱于嶽瀆甲子呂夷簡罷議
軍國大事五月丁卯朔日有食之庚午錄繫囚戊寅詔
諸路轉運使並兼按察使歲具官吏能否以聞庚辰祈
雨于相國寺會靈觀癸未置御史六員罷推直官丁亥

置武學戊子雨已丑謝雨辛卯築欽天壇于禁中乙未
近臣薦試方略者六人授官有差是月忻州地大震虎
翼卒王倫叛于忻州六月甲辰詔諸路漕臣令所部官
吏條茶鹽礬及坑冶利害以聞秋七月辛未詔許二府
不限奏事常制得敷陳留對丙子王舉正罷壬午罷陝
西管內營田甲申命任中師宣撫河東范仲淹宣撫陝
西乙酉獲王倫八月乙未朔命官詳定編敕戊戌詔諫
官日赴內朝丁未以范仲淹參知政事富弼爲樞密副
使壬子白氣貫北斗魁癸丑韓琦代范仲淹宣撫陝西
甲寅太白晝見戊午罷武學九月丁卯詔輔臣對天章
閣戊辰呂夷簡以太尉致仕乙亥任中師罷丁丑詔執
政大臣非假休不許私第受謁是月桂陽洞蠻寇邊湖
南提刑募兵討平之冬十月丙午詔中書樞密同選諸
路轉運使丁未詔縣令佐能根括編戶隱僞以增賦入
者量其數賞之戊申詔二府同選諸路提刑甲寅復諸
路轉運判官乙卯詔脩兵書壬戌詔二府須新定磨勘
式甲子築水洛城是月光化軍亂討平之十一月丙寅
上清宮火癸未詔館職有闕以兩府兩省保舉然後召
試補用丁亥更蔭補法壬辰限職田是月五星皆在東
方十二月乙巳桂陽監徭賊復寇邊丁巳大雨雪木冰

河北雨赤雪交吐獻馴象五安化州蠻來貢

四年春正月庚午京城雪寒詔三司減價出薪米以濟之壬申西蕃磨羶角入貢乙亥荆王元儼薨辛卯太常禮儀院上新脩禮書及慶曆祀儀二月丙辰出奉宸庫銀三萬兩振陝西饑民己酉白虹貫日甲寅罷陝西四路馬步軍都總管經略安撫招討使復置隨路都總管經略安撫招討使三月癸亥朔以旱遣內侍祈雨辛未省廣濟河歲漕軍儲二十萬石乙亥詔天下州縣立學更定科舉法語在選舉志己卯出御書治道三十五事賜講讀官庚辰錄唐郭子儀後甲申免衡道州桂陽監

民經徭賦劫略者賦役一年夏四月丙申詔湖南民誤爲征徭軍所殺者賜帛存撫其家丁酉宣州蠻歐希範叛詔廣西轉運鈐轄司發兵討捕壬子以錫慶院爲太學五月庚午錄繫囚壬申幸國子監謁孔子有司言舊儀止肅揖帝特再拜賜直講孫復五品服遂幸武成王廟又幸王津園觀種稻乙亥撫州獻生金山丙子詔西川知州軍監罷任未出界而卒者錄其子孫一人戊寅詔募人納粟振淮南饑乙酉忻州言地震有聲如雷丙戌曩霄遣人來復稱臣六月壬子降天下繫囚流徒罪一等杖笞釋之范仲淹宣撫陝西河東癸丑詔諸軍因

戰傷廢停不能自存及死事之家孤老月給米人三斗
秋七月戊寅封宗室德文等十人爲郡王國公壬午月
犯熒惑癸未契丹遣使來告伐夏國甲申夷人寇三江
若清井監官兵擊走之丙戌詔諸路轉運提刑察舉守
令有治狀者八月辛卯命賈昌朝領天下農田范仲淹
領刑法事甲午富弼宣撫河北戊戌命右正言余靖報
使契丹保州雲翼軍殺官吏據城叛庚子命右正言田
況度視保州仍聽便宜行事丙午進宗室官有差戊午
詔輔臣所薦官毋以爲諫官御史九月辛酉保州平壬
戌詔保州官吏死亂兵而無親屬者官爲殯斂兵官被
害及戰沒並優賜其家民田遭蹂踐者蠲其租癸亥以
真宗賢妃沈氏爲德妃婉儀杜氏爲賢妃戊辰呂夷簡
薨庚午晏殊罷乙亥遣使安撫湖南甲申以杜衍同中
書門下平章事兼樞密使集賢殿大學士賈昌朝爲樞
密使陳執中參知政事丁亥宴宗室太清樓射于苑中
冬十月庚寅賜曩霄誓詔歲賜銀絹茶綵凡二十五萬
五千陳堯佐薨丙申命范仲淹提舉三館祕閣繕校書
籍癸丑桂陽蠻降授蠻酋三人奉職十一月壬戌以西
界內附香布爲團練使己巳詔戒朋黨相許及按察恣
爲苛刻文人肆言行恠者己卯改上莊穆皇后諡日章

穆莊獻明肅皇太后曰章獻明肅莊懿皇太后曰章懿
莊懷皇后曰章懷莊惠皇太后曰章惠庚辰朝饗景靈
宮辛巳饗太廟奉慈廟壬午冬至祀天地于園丘大赦
十二月壬辰加恩百官乙未封曩霄爲夏國主丁酉詔
州縣以先帝所賜七條相誨敕辛亥置保安鎮戎軍權
場是歲黎州邛部川山前山後百蠻都鬼主牟黑來貢
五年春正月甲戌罷河東陝西諸路招討使乙亥復置
言事御史丙子契丹遣使來告伐夏國還庚辰命知制
誥余靖報使契丹癸未詔京朝官因被彈奏雖不會責
罰但有改移差遣並四周年磨勘乙酉范仲淹富弼罷
兩院社行罷以賈昌朝同中書門下平章事兼樞密使
集賢殿大學士王貽永爲樞密使宋庠參知政事吳育
龐籍並爲樞密副使二月辛卯詔罷京朝官用保任敘
遷法又罷蔭補限年法壬辰曩霄初遣人來賀正旦癸
卯以久旱詔州縣毋得淹繫刑獄辛亥祈雨于相國天
清寺會靈祥源觀癸丑桂陽監言唐和等復內寇乙卯
謝雨三月己未詔太宗正勵諸宗子授經務學辛酉韓
琦罷癸亥詔禮部貢舉甲子宜州蠻賊歐希範平庚午
東方有黃氣如虹貫月甲戌詔監司按察屬吏毋得差
官體量甲申詔陝西以曩霄稱臣降繫囚罪一等答釋

之邊兵第賜緡錢民去年逋負皆勿責蠲其租稅之半
麟府州嘗爲羌所掠除逋負租稅如之丙戌罷入粟補
官夏四月丁亥朔司天言日當食陰晦不見錄繫囚遣
官錄三京囚辛卯曩霄初遣人來賀乾元節戊申章得
象罷以賈昌朝爲昭文館大學士陳執中同中書門下
平章事集賢殿大學士兼樞密使庚戌以吳育參知政
事丁度爲樞密副使五月己巳罷諸路轉運判官閏月
丙午曩霄遣人來謝冊命六月丁卯減益梓州上供絹
歲三之一紅錦鹿胎半之秋七月戊申以廣州地震八
月庚午荆南府岳州地震九月庚寅詔文武官已致仕
而舉官犯罪當連坐者除之辛卯以重陽曲宴近臣宗
室于太清樓遂射苑中冬十月乙卯契丹遣使來獻九
龍車及所獲夏國羊馬辛酉祔章獻明肅皇后章懿皇
后神主于太廟大赦罷轉運使兼按察庚午幸瓊林苑
遂改楊村遣使以所獲馳薦太廟召父老賜以飲食茶
帛辛未頒曆于夏國庚辰罷宰臣兼樞密使十一月丁
亥冬至宴宗室于崇政殿己酉詔河北長吏舉殿直供
奉官有武才者是歲施州溪洞蠻西南夷龍以特來貢
六年春正月戊申徙廣南戍兵善地以避瘴毒二月戊
寅青州地震詔陝西經略安撫及轉運司議裁節諸費

及所置官員無用者以聞三月辛巳朔日有食之錄繫
囚庚寅登州地震岬嶠山摧自是屢震輒海底有聲如
雷甲午月犯歲星是月賜禮部奏名進士諸科及第出
身八百五十三人夏四月甲寅遣使賜湖南戍兵方藥
五月甲申京師雨雹地震丙戌錄繫囚戊子減邛州鹽
井歲課緡錢一百萬丙申詔陝西市蕃部馬丁酉京東
人劉蚤劉沔胡信謀反伏誅六月庚戌朔詔夏竦與河
北監司察帥臣長吏之不職者丁巳有流星出營室南
其光燭地隱然有聲丙寅以久旱民多暍死命京城增
鑿井三百九十丁丑詔制科隨禮部貢舉秋七月丁亥

月犯南斗庚寅河東經略司言雨壞忻代等州城壁八
月癸亥策試賢良方正能直言極諫并試武舉人癸酉
以吳育爲樞密副使丁度參知政事九月甲辰登州言
有巨木三千餘浮海而出冬十月辛未詔發兵討湖南
徭賊十一月己卯遣官議夏國公封界癸未湖南徭賊
寇英韶州界辛丑畋東韓村乘輿所過及圍內田蠲其
租一年是歲邈川首領喃厮囉西蕃瞎躡磨躡角安化
州蠻蒙光速等來貢交趾獻馴象十道州部龐會李石
壁等降

七年春正月丙子朔御大慶殿受朝丁亥詔河北所括

馬死者限二年償之己亥頒慶曆編敕壬寅詔減連州民被徭害者來年夏租二月己酉詔取益州交子三十萬於秦州募人入中糧丙辰令內侍二人提舉月給軍糧三月壬午錄繫囚癸未詔天下有能言寬恤民力之事者有司驛置以聞以其副上之轉運司詳其可行者輒行之毀後苑龍船丁亥以旱罷大宴癸巳詔避正殿減常膳許中外臣僚實封條上三事乙未賈昌朝罷以陳執中爲昭文館大學士夏竦同中書門下平章事集賢殿大學士吳育爲給事中歸班文彥博爲樞密副使罷出獵丁酉以夏竦爲樞密使文彥博參知政事高若訥爲樞密副使辛丑祈雨于西太一宮及還遂雨壬寅陳執中宋庠丁度以旱降官一等夏四月丁未謝雨己酉詔前京東轉運使薛紳專任文史伺察郡縣細過江東轉運使楊紘判官王緯提點刑獄王鼎苛刻相尚並削職知州自今毋復用爲部使者壬子御正殿復常膳乙卯復執中庠度官己巳詔諫官非公事毋得私謁五月戊寅詔武臣非歷知州軍無過者毋授同提點刑獄己丑補降徭唐和等爲峒主己亥命翰林學士楊察蠲放天下適負辛丑詔西北二邊有大事二府與兩制以上雜議之六月乙巳詔禁畜猛獸害人者辛酉詔天下

知縣非鞫獄毋得差遣壬戌詔臣僚朝見者留京毋過十日秋七月癸未奉安太祖太宗真宗御容于南京鴻慶宮甲申德音降南京畿內囚罪一等徒以下釋之賜民夏稅之半除災傷倚閣稅及欠折官物非侵盜者辛丑禁貢餘物饋近臣八月乙丑析河北爲四路各置都總管九月丁酉詔刪定一州一縣敕冬十月壬子李迪薨甲子幸廣親宅謁太祖太宗神御殿宴宗室賜器幣有差乙丑河陽許州地震十一月乙未加上真宗諡丙申朝饗景靈宮丁酉饗太廟奉慈廟戊戌冬至祀天地于園丘大赦貝州宣毅卒王則據城反十二月戊申加恩百官庚戌樞密直學士明鑄體量安撫河北癸丑詔貝州有能引致官兵獲賊者授諸衛上將軍甲寅遣內侍以敕榜招安貝賊是歲西蕃磨曷角來貢八年春正月丁丑文彥博宣撫河北明鑄副之壬午江寧府火乙未日赤無光閏月辛丑貝州平甲辰曲赦河北賜平貝州將士緡錢戰沒者官爲葬祭兵所踐民田蠲其稅改貝州爲恩州戊申文彥博同中書門下平章事集賢殿大學士官吏將士有功者遷擢有差辛酉親從官顏秀等四人夜入禁中謀爲變宿衛兵捕殺之丙寅磔王則于都市丁卯知貝州張得一坐降賊伏誅二

月癸酉頒慶曆善教方夏國來告曩霄卒巳卯賜瀛莫
恩冀州緡錢二萬贖還饑民鬻子丁酉奉安宣祖大祖
太宗御容于睦親宅三月甲辰詔禮部貢舉辛亥遣使
體量安撫陝西甲寅幸龍圖天章閣詔輔臣曰西陲備
禦兵冗賞濫周知所從卿等各以所見條奏又詔翰林
學士三司使知開封府御史中丞曰朕躬闕失左右朋
邪中外險詐州郡暴虐法令有不便於民者朕欲聞之
其悉以陳壬戌以霖雨錄繫囚癸亥以朝政得失兵農
要務邊防備豫將帥能否財賦利害錢法是非與夫讒
人害政姦盜亂俗及防微杜漸之策召知制誥諫官御
史等諭之使悉對于篇夏四月巳巳朔封曩霄子諒祚
爲夏國主壬申丁度罷明鎬參知政事五月辛酉夏竦
罷宋庠爲樞密使龐籍參知政事六月戊辰朔詔近臣
舉文武官材堪將帥者丙子河決澶州商胡埽壬辰以
久雨齋禱甲午明鎬卒乙未詔館閣官須親民一任方
許入省府及轉運提點刑獄差遣丙申章得象薨秋七
月戊戌以河北水令州縣募饑民爲軍辛丑罷鑄鐵錢
八月巳丑以河北京東西水災罷秋宴九月戊午詔三
司以今年江淮漕米轉給河北州軍冬十一月巳亥作
皇帝欽崇國祀之寶壬戌出廩米減價以濟畿內貧民

十二月乙丑朔以霖雨爲災頒德音改明年元減天下囚罪一等徒以下釋之出內藏錢帛賜三司買粟以濟河北流民所過官爲舍止之所賣物毋收筭丁卯冊美人張氏爲貴妃戊子遣使體量安撫利州路是歲廬州合肥縣稻再實交州來貢

皇祐元年春正月甲戌朔日有食之以河北水災罷上元張燈停作樂庚戌張士遜薨己未詔以緡錢二十萬市穀種分給河北貧民辛酉詔臺諫非朝廷得失民間利病毋風聞彈奏二月戊辰以河北疫遣使頒藥辛未發禁軍十指揮赴京東西路備盜三月丁巳錄繫囚己

未契丹遣使來告伐夏國庚申翰林院學士錢明逸報使契丹是月賜禮部奏名進士諸科及第出身千三百九人四月癸未梓州轉運司言清井監夷人平六月甲子蠲河北復業民租賦二年甲戌始置觀文殿大學士戊寅詔中書樞密非聚議毋通賓客戊子詔轉運使提點刑獄所部官吏受贓失覺察者降黜秋七月丁酉詔臣僚毋得保薦要近內臣己未詔諸州歲市藥以療民疾八月壬戌陳執中罷以文彥博爲昭文館大學士宋庠同中書門下平章事集賢殿大學士龐籍爲樞密使高若訥參知政事梁適爲樞密副使甲申策制舉武舉

宋史卷十一
本紀第十一
人九月乙巳廣源州蠻儂智高寇邕州詔江南福建等
路發兵以備戊午太白犯南斗己未罷武舉冬十一月
丙申詔河北被災民八十以上及篤疾不能自存者人
賜米一石酒一斗辛丑詔民有冤貧不能詣闕者聽訴
於監司以聞十二月甲子遣入內供奉高懷政督捕邕
州盜賊是歲大留國來貢

宋史卷十二

本紀第十二

開府儀同三司在國錄軍國事尚書右丞相監修國史領經筵事都總裁脫脫等修
皇明朝列大夫國子監祭酒臣方從哲

承德郎右春坊左贊善國子監業事臣黃汝良等奉

勅重校刊

仁宗四

二年春正月癸卯以歲饑罷上元觀燈壬子命近臣同
三司較天下財賦出入之數二月甲申出內庫絹五十
萬下河北陝西河東路以備軍賞三月戊子朔詔季秋
有事于明堂己丑以大慶殿爲明堂甲午遣官祈雨丁

酉月犯軒轅大星戊戌詔明堂禮成羣臣毋上尊號庚子契丹遣使以伐夏師還來告丙午雨巳酉詔兩浙流民聽人收養翰林學士趙槩報使契丹夏五月丁亥朔新作明堂禮神王巳亥旌定州義民李能六月巳未出新製明堂樂八曲丁卯以自製黃鐘五音五曲並肄于太常庚午定選舉縣令法壬申月犯填星癸未錄繫囚熒惑入輿鬼犯積尸癸亥出內藏絹百萬市糴軍儲壬申深州大雨壞廬舍九月丁亥閱雅樂巳酉朝饗景靈宮庚戌饗太廟辛亥大饗天地于明堂以太祖太宗真宗配如園丘大赦百官進秩一等詔自今內降指揮百司執奏毋輒行敢因緣干請者諫官御史察舉之冬十月庚午熒惑犯太微上將乙亥宴京畿父老于錫慶院閏十一月巳未詔后妃之家毋得除二府職任丙寅秀州地震有聲如雷丁卯詔中書門下省兩制及太常官詳定大樂河北水詔蠲民租出內藏錢四十萬緡絹四十萬匹付本路使措置是歲芻糧十二月甲申定三品以上家廟制喚厮囉西蕃瞎躡西南蕃龍光泚占城沙州來貢涇原路生戶都首領那龍男阿日丁內附三年春正月乙丑幸魏國大長公主第視疾二月丙戌宰臣文彥博等進皇祐大饗明堂記巳亥復行河北沿

邊州軍入中糧草見錢法三月庚申宋庠罷以劉沆參
知政事癸酉儂智高表獻馴象及金銀卻之夏四月癸
未詔河北流民相屬吏不加恤而乃飾厨傳交賂使客
以取名譽自今非犒設兵校其一切禁之丙申太白晝
見五月庚戌以恩冀州旱詔長吏決繫囚壬申置河渠
司乙亥頒簡要濟衆方命州縣長吏按方劑以救民疾
丁丑錄繫囚六月丁亥無爲軍獻芝草帝命姑免知軍
茹孝標罪戒州郡自今勿復獻秋七月癸丑詔少卿監
以下年七十不任釐務者御史臺審官院以聞嘗任館
閣臺諫及提刑者中書裁處待制以上能自引年則優
加恩禮丙辰以孔氏子孫復知仙源縣事丁巳兩制禮
官上大樂名曰太安辛酉河決大名府郭固口乙丑罷
徙州縣長吏不任事者十有六人丙子減郴永州桂陽
監丁身米歲十萬餘石八月丙戌遣使安撫京東淮南
兩浙荆湖江南饑民辛卯詔諸路監司具所部長吏治
狀能否以聞是月汴河絕流冬十月庚子文彥博罷以
龐籍同中書門下平章事昭文館大學士高若訥爲樞
密使梁適參知政事王堯臣爲樞密副使十一月辛亥
減漳州泉州興化軍丁米十二月庚辰新作渾儀庚子
詔文武官七十以上未致仕者更不考課遷官甲辰罷

災傷州軍貢物是歲涇原樊家族密廝歌內附

四年春正月己巳詔諸路貸民種乙亥塞大名府決河
二月庚子蠲湖州民所貸官米三月己酉詔禮部貢舉
丙辰蠲江南路民所貸種數十萬斛辛酉錄繫囚辛未
詔官禁市物給實直非所關者毋市夏四月庚辰詔脩
河兵夫逃亡死傷會其數以議官吏之罰廣源州蠻儂
智高反五月乙巳朔智高陷邕州遂陷橫貴等八州圍
廣州壬申命知桂州陳曙率兵討智高六月乙亥起前
衛尉卿余靖爲秘書監湖南安撫使知潭州前尚書屯
田員外郎直史館楊敞體量安撫廣南提舉經制盜賊
事庚辰改余靖爲廣西安撫使知桂州命同提點廣東
刑獄李樞與陳曙討智高廣東轉運鈐轄司發兵援之
丁亥以狄青爲樞密副使秋七月乙巳出內藏錢絹助
河北軍儲丙午命余靖經制廣南盜賊事丁巳大風拔
木壬戌智高引衆去廣州廣東兵馬鈐轄張忠知英州
蘇緘邀擊于白田忠戰沒甲子廣東兵馬鈐轄蔣偕又
敗于路田八月癸未詔開封府北大風雨民廬摧圮壓
死者官爲祭斂之辛卯命樞密直學士孫沔安撫湖南
江西內侍押班石全斌副之九月丁巳命余靖提舉廣
南兵甲經制賊盜事庚申廣西兵馬鈐轄王正倫討智

高子昭州館門驛戰沒智高入昭州庚午以狄青爲宣
徽南院使宣撫荆湖路提舉廣南經制賊盜事是月智
高襲殺蔣偕于太平場冬十月丙子太白犯南斗詔鄜
延環慶涇原路擇蕃落廣銳軍各五十人赴廣南行營
丁丑智高入賓州甲申復入邕州丁亥以諸路饑疫并
征徭科調之煩令轉運使提點刑獄親民官條陳救恤
之術以聞十一月壬寅朔日有食之戊午詔免江西湖
南廣南民供軍須者今年秋租十之三十二月壬申朔
廣西兵馬鈐轄陳曙討智高兵戰于金城驛壬辰觀新
樂乙未錄唐顏真卿後是歲河北路及鄜州水饑河北
民積年逋負鄜州民稅役

五年春正月壬寅朔御大慶殿受朝庚戌以廣南用兵
罷上元張燈白虹貫日丁巳會靈觀火戊午狄青敗智
高于邕州斬首五千餘級智高遁去甲子遣使撫問廣
南將校賜軍士緡錢二月癸未狄青復爲樞密副使甲
申赦廣南凡戰歿者給槨槨護送還家無主者葬祭之
賊所過郡縣免其田租一年死事家科徭二年貢舉人
免解至禮部不預奏名者亦以名聞丙戌詔廣西都監
蕭注等追捕智高丁亥下德音減江西湖南繫囚罪一
等徒以下釋之丁壯饋運廣南軍須者減夏稅之半仍

免差徭一年戊子詔百官遇南郊奏薦無子孫者聽奏
朞親一人乙未詔宗室通經者大宗正司以聞三月癸
亥遣使奉安太祖御容于滁州太宗御容于并州眞宗
御容于澶州是月賜禮部奏名進士諸科及第出身千
四十二人夏四月甲午命劉沆梁適監議大樂五月乙
巳詔輔臣凡有大政許復對後殿高若訥罷以狄青爲
樞密使丁未孫沔爲樞密副使戊申詔轉運使毋取羨
餘以助三司庚戌詔智高所至州無城壘若兵力不敵
而棄城者奏裁壬子錄繫囚丁巳詔轉運司振邕州貧
民戶貸米一石甲子詔諫官御史毋挾私以中善良及
臣僚言機密事毋得漏泄六月乙亥御紫宸殿按太安
樂觀宗廟祭器丙戌作集禧觀成乙未詔河北荐饑轉
運使察州縣長吏能招輯勞來者上其狀不稱職者舉
劾之秋七月乙巳詔荆湖北路民因災傷所貸常平倉
米免償已酉詔薦舉非其人者令御史臺彈奏見任監
司以上弗許薦論戊午詔太常定諡毋爲溢美閏月戊
辰詔廣南民逃未還者限一年歸業其復三歲壬申龐
籍罷以陳執中同中書門下平章事昭文館大學士梁
適同中書門下平章事集賢殿大學士乙亥詔武臣知
州軍須與僚屬參議公事毋專決庚辰秦鳳路言總管

劉煥等破蕃部斬首二千餘級八月丁酉朔詔民訴災傷而監司不受者聽州軍以狀聞辛酉策制舉武舉人壬戌詔南郊以太祖太宗真宗並配九月乙酉觀新樂冬十月丙申朔日有食之壬子作鎮國神寶丁巳詔以蝗旱令監司諭親民官上民間利害十一月丁卯朝饗景靈宮戊辰饗太廟奉慈廟巳巳祀天地于園丘大赦丁丑加恩百官戊子放天下逋負十二月戊午詔轉運官毋得進羨餘壬戌以曹陳許鄭滑州爲輔郡隸畿內置京畿轉運使是歲占城國來貢

至和元年春正月辛未詔京師大寒民多凍餒死者有司其瘞埋之壬申碎通天犀和藥以療民疫癸酉貴妃張氏薨輟視朝七日禁京城樂一月丁丑追冊爲皇后賜諡溫成辛卯錄繫囚減三京輔郡雜犯死罪一等徒以下釋之三月庚子詔治河堤民有疫死者蠲戶稅一年無戶稅者給其家錢三千壬戌孫沔罷以田况爲樞密副使三月巳巳王貽永罷以王德用爲樞密使辛未命曾公亮等同試入內醫官壬申賜邊臣攻守圖置京畿提點刑獄乙亥太史言日當食四月朔庚辰下德音改元減死罪一等流以下釋之癸未易服避正殿減常膳乙酉詔京西民饑宜令所在勸富人納粟以振之夏

四月甲午朔日有食之用牲于社辛丑御正殿復常膳
祥源觀火五月戊寅以河北流民稍復遣使安撫壬辰
太白晝見秋七月丁卯以程戡參知政事立溫成園戊
辰梁適罷己巳出御史馬遵呂景初吳中復八月丁酉
詔前代帝王後嘗仕本朝官八品以下其祖父母妻子
犯流以下罪聽贖未仕而嘗受朝廷賜者所犯非兇惡
亦聽贖丙午以劉沆同中書門下平章事集賢殿大學
士命脩起居注官侍經筵九月乙亥契丹遣使來告夏
國平辛巳遣三司使王拱辰報使契丹己丑太白晝見
冬十月辛卯朔太白晝見壬辰詔士庶家母得以常備
顧之人爲姻達者離之丁酉葬溫成皇后丙午溫成皇
后神主入廟戊午幸城北砲場觀發砲宴從臣賜衛士
緡錢十一月甲子出太廟禘祫時饗及溫成皇后樂章
肄于太常十二月丙午詔司天監天文筭術官毋得出
入臣僚家癸丑詔內侍傳宣令都知司劄報被旨者覆
奏是歲融州大丘洞楊光朝內附

二年春正月丁卯奉安真宗御容于萬壽觀減畿內輔
郡囚罪一等徒以下釋之賜諸軍緡錢戊辰邕州言蘇
茂州蠻內寇詔廣西發兵討之丁亥晏殊薨二月壬辰
汾州團練推官郭固上車戰法既試之授衛尉丞三月

丁卯詔脩起居注立於講讀官之次丙子封孔子後爲
衍聖公是月以旱除畿內民逋芻及去年秋逋稅罷營
繕諸役夏四月己亥契丹遣使賀乾元節以其主之命
持本國三世畫像來求御容辛亥定差衙前法乙卯出
米京城門下其價以濟流民五月己未錄繫囚辛酉詔
中書公事並用祖宗故事戊寅詔戒百官務飭官守六
月戊戌陳執中罷以文彥博同中書門下平章事昭文
館大學士劉沆監脩國史富弼同中書門下平章事集
賢殿大學士乙巳儂智高母儂氏弟智光子繼宗繼封
伏誅秋八月戊子減畿內輔郡囚罪一等徒以下釋之
乙未置臺諫章奏簿壬子詔中書樞密院第宗姓服屬
自明堂覃恩後及十年者咸與進官九月戊午契丹使
來告其國主宗真殂帝爲發哀成服于內東門幕次遣
使祭奠弔慰及賀其子洪基立戊辰詔試醫官須引醫
經本草以對每試十道以六通爲合格辛巳罷輔臣宣
徽節度使乾元節任子恩冬十月丙戌錄唐長孫無忌
後已丑詔京畿毋領輔郡罷京畿轉運使提點刑獄癸
丑下溪州蠻彭仕義內寇詔湖北路發兵捕之十一月
乙卯交趾來告李德政卒其子日尊上德政遺貢物及
馴象己未行並邊見錢和糴法十二月丁亥脩六塔河

丁酉詔武臣有賊濫者毋得轉橫行其立戰功者許之
庚子契丹遣使致其主宗真遺留物及謝弔祭庚戌太
白晝見壬子作醴泉觀成是歲西界阿訛等內附詔遣
還龍賜州彭師黨以其族來歸大食國西蕃安化州蠻
來貢

嘉祐元年春正月甲寅朔御大慶殿受朝是日不豫辛
酉輔臣禱祠于大慶殿齋宿殿廡近臣禱于寺觀及遣
諸州長吏禱于嶽瀆諸祠壬戌御崇政殿癸亥賜在京
諸軍緡錢甲子赦天下蠲被災田租及倚閣稅戊辰罷
上元張燈辛未命輔臣禱天地宗廟社稷是月大雨雪

木冰二月甲辰帝疾愈御延和殿三月丁巳詔禮部貢
舉辛未司天監言自至和元年五月客星晨出東方守
天關至是沒壬申遣官謝天地宗廟社稷寺觀諸祠癸
酉契丹遣使來謝閏月癸未朔以王堯臣參知政事程
戡爲樞密副使詔前後殿間日視事夏四月壬子朔六
塔河復決丙辰裁定補蔭選舉法甲戌錄繫囚是月大
雨水注安上門門關折壞官私廬舍數萬區諸路言江
河決溢河北尤甚六月辛亥朔詔雙日不御殿伏終如
舊辛未免畿內京東西河北被水民賦租乙亥雨壞太
社太稷壇戊寅遣使安撫河北己卯詔羣臣實封言時

政闕失秋七月乙酉命京東西湖北監司分行水災州
軍振饑蠲租丙戌賜河北流民米壓溺死者賜其家錢
有差已丑出內藏銀絹三十萬振貸河北月入南斗乙
巳貸被水災民麥種是月葇出紫微垣長丈餘環州小
遇族叛知州張揆破降之八月庚戌朔日有食之癸亥
狄青罷以韓琦爲樞密使是夕葇滅甲子出恭謝樂章
肄于太常乙亥朝謁景靈宮減京城繫囚徒罪一等杖
笞釋之戊寅詔湖北招安彭仕義九月庚寅命宰臣攝
事于太廟辛卯恭謝天地于大慶殿大赦改元丁酉加
恩百官庚子賜致仕卿監以上及曾任近侍之臣粟帛
酒饌癸卯舉行御史遷次格自京至泗州置汴河木岸
十一月辛巳王德用罷賈昌朝爲樞密使十二月壬子
劉沆罷以曾公亮參知政事甲子白虹貫日是歲西蕃
磨熵角占城大食國來貢融桂州蠻楊克端等內附
二年春二月己酉梓夔路三里村夷人寇清井監庚戌
錄繫囚降罪一等徒以下釋之遣使錄三京輔郡繫囚
壬戌杜衍薨澧州羅城洞蠻內寇發兵擊走之癸酉王
德用卒是月雉霸州地震三月戊寅振河北被災民乙
未契丹使耶律防陳覲來求御容戊戌淮水溢遣張昇
報使契丹癸卯狄青卒是月賜禮部奏名進士諸科及

第出身八百七十七人親試舉人免黜落始此夏四月
丁未以河北地震遣使安撫丙寅幽州地震壞城
郭覆壓死者數萬人己巳邕州火峒蠻儂宗旦入寇癸
酉以彭仕義未降遣官安撫湖北五月庚辰管勾麟府
軍馬公事郭恩爲夏人所襲歿于斷道塢己亥詔舉行
磨勘法六月戊午夏國主諒祚遣人來謝使弔祭戊辰
以淑妃苗氏爲賢妃秋七月辛巳詔河北諸道總管分
遣兵官教閱所部軍辛卯命孫抃張昇磨勘轉運使及
提點刑獄課績丁酉詔陝西河北諸路經略安撫舉文
武官材堪將領者各一人八月己酉詔每歲賜諸道節
鎮諸州錢有差命長吏選官和藥以救民疾壬子命富
弼等詳定編敕庚申錄繫囚降罪一等徒以下釋之癸
亥策制舉人丁卯置廣惠倉九月庚子契丹再使蕭扈
吳湛來求御容冬十月乙巳遣胡宿報使契丹丙午班
祿令十一月丙申詔三司使體量判官才否以聞十二
月戊申詔自今間歲貢舉天下進士諸科解舊額之半
置明經科罷說書舉人辛亥立內降關白二府法是歲
西蕃瞎孛并諸族西平州黔南道王石自品西南蕃鷄
州來貢

三年春正月戊戌鑿永通河二月癸卯契丹使來告其

祖母哀輟視朝七日遣使祭奠弔慰癸丑錄繫囚降罪
一等徒以下釋之三月甲戌詔禮部貢舉夏四月甲子
吳育卒乙丑罷睦親宅祖宗神御殿丙辰詔守令或貪
恣耄昏以弛爲寬以苛爲察以增賦斂爲勞以出入刑
罰爲能而部使者莫之舉劾自今其各思率職毋撓權
倖毋縱有罪以稱朕意五月壬申增國子監生員甲午
契丹遣使致其祖母遺留物六月丙午文彥博賈昌朝
罷以富弼爲昭文館大學士韓琦同中書門下平章事
集賢殿大學士宋庠田况爲樞密使張昇爲樞密副使
甲寅詔學士院編國朝制誥丁卯交趾貢異獸秋七月
丙子詔廣濟河溢原武縣河決遣官行視民田振恤被
水害者癸巳以夔州路旱遣使安撫八月己亥朔日有
食之己未王堯臣卒庚申彭仕義率衆降九月癸酉議
罷榷茶法己丑契丹遣使來謝冬十月癸亥除河北坊
郭客戶乾食鹽錢十一月癸酉議減冗費己丑置都水
監罷三司河渠司十二月己巳詔三司歲上天下稅賦
之數三歲一會虧贏以聞閏月丁卯朔詔吏人及伎術
官職毋得任知州軍提點刑獄自軍班出至正任者方
得知邊要州軍丁丑詔裁定制科及進士高第人恩數
庚辰詔明年正旦日食其自丁亥避正殿減常膳宴契

丹使毋作樂壬午錄繫囚降三京囚罪一等徒以下釋之是歲安化上中下州北遐鎮蠻人來貢

四年春正月丙申朔日有食之用牲于社辛丑御正殿復常膳以自冬雨雪不止遣官分行京城賜孤窮老疾錢畿縣委令佐爲糜粥濟饑壬寅賜在京諸軍班緡錢頒嘉祐驛令二月己巳罷榷茶庚午廣南言交趾寇欽州乙亥以廣惠倉隸司農寺戊子白虹貫日三月戊戌命近臣同三司減定民間科率是月賜進士諸科及第出身三百三十九人夏四月丁卯詔孟冬大禘于太廟

癸酉封柴氏後爲崇義公給田千頃奉周室祀丙子復

銀臺司封駁制癸未陳執中薨辛卯詔中外臣庶居室器用冠服妾媵有違常制必罰毋貸壬辰錄繫囚降罪一等徒以下釋之大震雷雨雹五月戊戌詔兩制臣僚舊制不許詣執政私第所舉薦不得用爲御史今除其法庚子詔內臣員多權寵進養子入內壬子遣官經界河北牧地餘募民種藝六月己巳羣臣請加尊號曰大仁至治表五上不許癸酉詔諸路經略安撫轉運使提點刑獄各舉本部官有行實政事者三人以備升擢嘗任兩府者許舉內外官丁丑詔轉運司凡隣州饑而輒閉糶者以違制論辛卯放宮女二百十四人秋七月丁

未放宮女二百三十六人八月乙亥策制舉人冬十月
壬申朝饗景靈宮癸酉大禱于太廟大赦詔諸路監司
察士有學行爲鄉里所推者同長吏以聞民父母年八
十以上復其一丁復益州爲成都府并州爲太原府戊
寅加恩百官十一月庚子汝南郡王允讓薨十二月丁
丑白虹貫日是歲响廝囉來貢

五年春正月辛卯朔白虹貫日太白犯歲星己亥錄劉
繼元後二月壬戌錄繫囚三月壬辰詔禮部貢舉癸巳
劉沆薨乙未歲以星晝見壬子詔以蝗澇相仍敕轉運使
提點刑獄督以縣振濟仍察不稱職者夏四月癸未程

戡罷以孫抃爲樞密副使丙戌命近臣同三司議均稅
五月戊子朔京師民疫選醫給藥以療之己丑京師地
震丁酉詔三司置寬恤民力司己酉王安石召入爲三
司度支判官丁巳錄繫囚降罪一等徒以下釋之六月
乙丑詔戒上封告訐人罪或言赦前事及言事官彈劾
小過不關改體者乙亥遣官分行天下訪寬恤民力事
秋七月癸巳邕州言交趾與甲峒蠻合兵寇邊都巡檢
宋士堯拒戰死之詔發諸州兵討捕丙申詔待制臺諫
官正刺史以上各舉諸司使至三班使臣堪將領及行
陣戰鬪者三人戊戌翰林學士歐陽脩上新脩唐書庚

戊詔中書門下采端實之士明進諸朝辨激巧僞者放黜之八月壬申詔求逸書庚辰置陝西估馬司乙酉罷諸路同提點刑獄使臣丙戌置江湖閩廣四川十一路轉運判官九月己丑太白晝見冬十月乙酉深州言野蠶成繭被于原野十一月辛卯罷內臣寄遷法辛丑宋庠罷以曾公亮爲樞密使張昇孫抃爲參知政事歐陽脩陳升之趙槩爲樞密副使十二月己卯蘇茂州蠻寇邕州辛巳補諸州父老百歲以上者十二人爲州助教是歲大食國來貢

六年春正月乙未許兩制與臺諫相見二月丁巳詔宗

室賜名授官者須年及十五方許轉官乙丑詔良民子弟或爲人誘隸軍籍自今兩月內父母訴官者還之丙寅錄繫囚降罪一等徒以下釋之三月己亥富弼以母喪去位庚子以富弼母喪罷大宴戊申給西京周廟祭享器服是月賜進士諸科及第同出身二百九十五人夏四月辛酉詔嶺南官吏死于儂賊而其家流落未能自歸者所在給食護送還鄉庚辰陳升之罷以包拯爲樞密副使出諫官唐介趙抃御史范師道呂誨五月丙戌官諸路敦遣行義文學之士七人庚戌錄繫囚降罪一等徒以下釋之分命官錄三京繫囚六月壬子朔日

有食之乙丑太白晝見壬申歲星晝見丙子以司馬光
知諫院入對戊寅以王安石知制誥秋七月乙酉泗州
淮水溢丙戌詔淮南江浙水災差官體量蠲稅戊子錄
昭憲皇太后孝明孝惠孝章淑德皇后家子孫進秩授
官者十有九人癸巳詔臺諫爲耳目之官乃聽險陂之
人典造飛語中傷善良非忠孝之行也中書門下其申
徹百工務敦行實循而弗改者絀之八月乙亥策制舉
人丁丑詔諸路刺舉之官未有以考其賢否比令有司
詳定厥制其各務祇新書以稱朕意仍令考校轉運提
刑課績院以新定條目施行戊寅詔州縣長吏有清白
不擾而實惠及民者令本路監司保薦再任政績尤異
當加獎擢閏月乙酉復以成都府爲劔南西川節度庾
子以韓琦爲昭文館大學士曾公亮同中書門下平章
事集賢殿大學士張昇爲樞密使辛丑以胡宿爲樞密
副使冬十月壬午定內侍磨勘法丙戌詔京西淮浙荆
湖增置都同巡檢壬辰起復皇姪前右衛大將軍岳州
團練使宗實爲秦州防禦使知宗正寺辭以喪不拜十
一月己巳許夏國用漢衣冠癸酉賜昭憲皇太后家信
陵坊第戊寅許康州刺史李樞以己官封贈父母十二
月丙戌復豐州庚寅命諸路總管集隨軍功過簿以備

遷補是歲冬無冰占城國獻馴象安化州蠻來貢

七年春正月辛未復命皇姪宗實爲秦州防禦使知宗
正寺乙亥詔南郊以太祖配爲定制改溫成皇后廟爲
祠殿二月己卯朔更江西鹽法詔開封府市地于四郊
給錢瘞民之不能葬者癸未錄繫囚命官錄被水諸州
繫囚三月辛亥詔禮部貢舉乙卯孫抃罷以趙槩參知
政事吳奎爲樞密副使甲子以旱罷大宴乙丑祈雨于
西太一宮庚午謝雨壬申徐州彭城濠州鍾離地生麩
十餘頃民皆取食夏四月壬午頒嘉祐編敕己丑夏國
主諒祚進馬來賜書詔賜九經還其馬五月戊午太白

晝見庚午包拯卒六月丙子朔歲星晝見秋七月戊申
太白經天壬子詔季秋有事于明堂八月乙亥朔出明
堂樂章肄于太常己卯詔以宗實爲皇子癸未賜名曙
丁亥奉安眞宗御容于壽星觀庚子以立皇子告天地
宗廟諸陵九月乙巳朔以皇子爲齊州防禦使進封鉅
鹿郡公己酉朝饗景靈宮庚戌饗太廟辛亥大饗明堂
奉眞宗配大赦己未加恩百官冬十月乙亥皇子表辭
所除官賜詔不允丙戌白虹貫日乙未太白晝見丙申
詔內藏庫三司共出緡錢一百萬助糴天下常平倉十
二月甲午德妃沈氏爲貴妃賢妃苗氏爲德妃丙申幸

龍圖天章閣召羣臣宗室觀祖宗御書又幸實文閣爲
飛白書分賜從臣作觀書詩命韓琦等屬和遂宴羣王
殿庚子再召從臣于天章閣觀瑞物復宴羣王殿是歲
冬無冰占城來貢

八年春正月辛亥交趾貢馴象九二月癸未帝不豫甲
申下德音減天下囚罪一等徒以下釋之丙戌中書樞
密奏事于福寧殿之西閣三月戊申罷籍薨癸亥御內
東門帷殿優賜諸軍緡錢甲子御延和殿賜進士諸科
及第同出身三百四十一人辛未帝崩于福寧殿遺制
皇子卽皇帝位皇后爲皇太后喪服以日易月山陵制
度務從儉約諡曰神文聖武明孝皇帝廟號仁宗十月
甲午葬永昭陵

贊曰仁宗恭儉仁恕出於天性一遇水旱或密禱禁庭
或跪立殿下有司請以玉清舊地爲御苑帝曰吾奉先
帝苑園猶以爲廣何以是爲燕私常服澣濯帷帶衾禩
多用繒纒宮中夜饑思膳燒羊戒勿宣索恐膳夫自此
戕賊物命以備不時之須大辟疑者皆令上獄歲常活
千餘吏部選人一坐失入死罪皆終身不遷每諭輔臣
曰朕未嘗詈人以死况敢濫用辟乎至於夏人犯邊禦
之出境契丹渝盟增以歲幣在位四十二年之間吏治

若偷惰而任事茂殘刻之人刑法似縱弛而決獄多平
允之士國未嘗無弊倖而不足以累治世之體朝未嘗
無小人而不足以勝善類之氣君臣上下惻怛之心忠
厚之政有以培壅宋三百餘年之基子孫一矯其所爲
馴致於亂傳曰爲人君止於仁帝誠無愧焉

宋史卷十二終

宋史卷十三

本紀第十三

開府儀同三司上柱國錄軍國重事前中書省丞相監脩國史領經筵事都總裁脫脫等
皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

英宗

英宗體乾應曆隆功盛德憲文肅武睿聖宣孝皇帝諱
曙濮安懿王允讓第十三子母曰仙遊縣君任氏明道
元年正月三日生於宣平坊第初王夢兩龍與日並墮
以衣承之及帝生赤光滿室或見黃龍游光中四歲仁

萬曆二十七年刊

宋史卷十三

本紀

一

宗養於內寶元二年豫王生乃歸濮邸帝天性篤孝好讀書不爲燕嬉褻慢服御儉素如儒者每以朝服見教授曰師也敢弗爲禮時吳王宮教吳克進宗室六歲仁宗付宗正帝書之屏風以自戒景祐三年賜名宗實授左監門衛率府副率累遷右羽林軍大將軍宜州刺史皇祐二年爲右衛大將軍岳州團練使嘉祐中宰相韓琦等請建儲仁宗曰宗子已有賢知可付者卿等其勿憂時帝方服濮王喪六年十月辛卯起爲秦州防禦使知宗正寺帝以終喪辭奏四上乃聽喪終復授前命又辭七年八月許罷宗正復爲岳州團練使戊寅立爲皇子癸未改今名帝聞詔稱疾益堅辭詔同判大宗正事安國公從古等往諭旨卽臥內起帝以入甲辰見清居殿自是日再朝或入侍禁中九月遷齊州防禦使鉅鹿郡公八年仁宗崩夏四月壬申朔皇后傳遺詔命帝嗣皇帝位百官入哭盡哀韓琦宣遺制帝御東楹見百官癸酉大赦賜百官爵一等優賞諸軍如乾興故事遣王道恭告哀于契丹帝欲亮陰三年命韓琦攝冢宰宰臣不可乃止乙亥帝不豫遣韓贄等告卽位于契丹丙子尊皇后曰皇太后己卯詔請皇太后同聽政壬午皇太后御小殿垂簾宰臣覆奏事乙酉作受命寶丁亥以皇

子右千牛衛將軍仲鍼爲安州觀察使光國公熒惑自
七年八月庚辰不見命宰臣祈禳至是月己丑見于東
方庚子立京兆郡君高氏爲皇后五月戊午以富弼爲
樞密使戊辰初御延和殿以疾未平命宰臣祈福于天
地宗廟社稷及寺觀又禱于岳瀆名山六月辛卯契丹
遣蕭福延等來祭弔秋七月壬子初御紫宸殿帝自六
月癸酉不御殿至是始見百官癸亥歲星晝見乙丑星
大小數百西流戊辰百官請大行皇帝諡于南郊八月
癸巳以生日爲壽聖節九月辛亥以光國公仲鍼爲忠
武軍節度使同中書門下平章事淮陽郡王改名頊戊
午上仁宗諡冊于福寧殿冬十月甲午葬仁宗于永昭
陵十一月丙午祔于太廟大風霾己酉減東西二京罪
囚一等免山陵役戶及靈駕所過民租辛亥契丹遣蕭
素等來賀卽位十一月己巳初御邇英閣召侍臣講讀
經史乙亥淮陽郡王頊出閣是歲于闐西南蕃來貢
治平元年春正月丁酉朔改元戊戌太白晝見己亥壽
聖節百官及契丹使初上壽于紫宸殿甲寅賞知唐州
趙尚寬脩溝堰增戶口進一官賜錢二十萬三月壬寅
命脩秦悼王冢置守護官戊午錄囚辛酉雨土夏四月
癸未放宮女百三十五人甲午祈雨于相國天清寺醴

泉觀賜諸軍錢有差五月己亥濟二股河戊申皇太后
還政庚戌初日御前後殿壬子詔皇太后稱聖旨出入
儀衛如章獻太后故事其有所須內侍錄聖旨付有司
覆奏卽行丙辰上皇太后宮殿名曰慈壽己未熒惑犯
太微上將壬戌以病愈命宰臣謝天地宗廟社稷及宮
觀閏月戊辰輔臣進爵一等六月己亥以淮陽郡王頊
爲穎王祈國公顥爲保寧軍節度使同中書門下平章
事東陽郡王鄆國公頊爲左衛上將軍增宗室教授丁
未增同知太宗正事一員辛亥作睦親廣親宅辛酉太
白晝見壬戌歲星晝見八月甲辰錄周世宗後甲寅太
白入太微垣乙卯遣兵部員外郎呂誨等四人充賀契
丹太后生辰正旦使刑部郎中章岷等四人充賀契丹
主生辰正旦使丙辰內侍都知任守忠坐不法貶保信
軍節度副使蘄州安置丁巳以上供米三萬石振宿亳
二州水災戶九月丁卯復武舉庚午詔夏國精擇使人
戒勵毋紊彝章冬十月丙申詔中外近臣監司舉治行
素著可備升擢者二人十一月乙亥科陝西戶三丁之
一刺以爲義勇軍凡十三萬八千四百六十五人各賜
錢二千諫官司馬光累上疏諫之不允戊寅復內侍養
子令十二月乙巳雨土丙辰契丹遣耶律烈等來賀壽

聖節蕭禧等來賀明年正旦是歲畿內宋亳陳許汝蔡
唐穎曹濮濟單濠泗廬壽楚杭宣洪鄂施渝州光化高
郵軍大水遣使行視疏治振恤蠲其賦租西蕃瞎躡子
瞎欺米征內附

二年春正月甲戌振蔡州二月甲辰大風晝冥丁未錄
囚是月賜禮部奏名進士明經諸科及第出身三百六
十一人三月己巳班明天曆夏四月戊戌詔議崇奉濮
安懿王典禮辛丑詔監司知州歲薦吏毋徒充數丙午
奉安仁宗御容于景靈宮丁未白氣起西方五月癸亥
詔以綜核名實勵臣下丙子詔自今皇子及宗室屬卑
者勿授以檢校師傅官乙酉詔宗室封王者子孫襲爵
六月壬辰錄囚己酉詔尚書集三省御史臺議奉濮安
懿王典禮甲寅罷尚書省集議令有司博求典故務在
合經詔遣官與契丹定疆界秋七月癸亥富弼罷丙寅
詔減乘輿服御丙子放宮女百八十人丁丑太白晝見
己卯羣臣五上尊號不允庚辰張昇罷以文彥博爲樞
密使八月庚寅京師大雨水癸巳賜被水諸軍米遣官
視軍民水死者千五百八十人賜其家緡錢葬祭其無
主者乙未以雨災詔責躬乞言初學士草詔曰執政大
臣其惕思天變帝書其後曰雨災專以戒朕不德可更

曰協德交脩己亥以水災罷開樂宴壬子以工部郎中
蔡抗等充賀契丹生辰使侍御史趙鼎等充賀契丹正
旦使乙卯減袞冕制度丙辰陝西置壯城兵九月壬戌
雨罷大宴己巳以災異風俗策制舉人壬午太白犯南
斗乙酉以久雨遣使祈于岳瀆名山大川冬十月乙巳
雨木冰十一月庚午朝饗景靈宮辛未饗太廟壬申有
事南郊大赦上皇太后冊冊皇后以齊州爲興德軍節
度辛巳加恩百官十二月辛亥太白晝見是歲蔣波繡
雲龍賜等州來貢

三年春正月丙辰朔契丹遣使耶律仲達等來賀正旦

戊午契丹遣使肅惟輔等來賀壽聖節丙寅幸降聖院
謁神御殿癸酉契丹改國號爲遼己卯溫州火燒民屋
萬四千間死者五千人丁丑皇太后下書中書門下封
濮安懿王宜如前代故事王夫人王氏韓氏任氏皇帝
可稱親尊濮安懿王爲皇夫人爲后詔遵慈訓以塋爲
園置守衛吏卽園立廟俾王子孫主祠事如皇太后旨
辛巳詔臣民避濮安懿王諱以王子宗懿爲濮國公壬
午黜御史呂誨范純仁呂大防二月乙酉朔白虹貫日
三月庚申彗星晨見于室辛酉黜諫官傅堯俞御史趙
鼎趙瞻戊辰上親錄囚庚午以彗避正殿減膳辛未以

黜呂誨等詔內外癸酉以災異責躬詔轉運使察獄訟
調役利病大者以聞辛巳彗晨見于昴如太白長丈有
五尺壬午字于畢如月夏四月丙午詔有司察所部左
道淫祀及賊殺善良不奉令者罪毋赦五月甲子罷知
雜御史觀察使以上歲舉人乙丑彗至張而沒戊辰謂
宰相曰朕欲與公等日論治道中書常務有定制者付
有司行之六月巳酉錄囚秋七月乙丑進濮王子孫及
魯王孫爵一等八月庚午遣傅卞等賀遼主生辰張師
顏等賀正旦九月壬子朔日有食之癸亥定待制諫官
朝官少卿郎中選選歲月補員格庚辰禁妃嬪公主以
下薦服親之夫冬十月壬午朔以仙遊縣君任氏墳域
爲園乙酉詔兩日一御邇英閣丁亥詔禮部三歲一貢
舉甲午詔宰臣叅知政事舉才行士可試館職者各五
人十一月戊午帝不豫禱于大慶殿巳未宰相始奏事
辛酉降天下囚死罪一等流以下釋之十二月乙未宰
相祈于天地宗廟社稷壬寅立穎王頊爲皇太子癸卯
大赦賜文武官子爲父後者勳一轉遼遣蕭靖等來賀
正旦壽聖節是歲遣使以違約數寇責夏國諒祚獻方
物謝罪

四年春正月庚戌朔羣臣上尊號曰體乾膺曆文武聖

孝皇帝降天下囚罪一等徒以下釋之大風霾辛亥蜀
京師通麴錢丁巳帝崩于福寧殿壽三十六諡曰憲文
肅武宣孝皇帝廟號英宗帝自居睦親宅孝德著聞濮
安懿王薨以所服玩物分諸子帝所得悉以與王府舊
人既葬而辭去者宗室有假金帶而以銅帶歸主吏以
告帝曰真吾帶也受之命殿侍鬻犀帶直錢三十萬亡
之帝亦不問初辭皇子請潭王宮教授周孟陽作奏孟
陽有所勸戒卽謝而拜之奏十餘不允始就召戒舍人
曰謹守吾舍上有適嗣吾歸矣既爲皇子慎靜恭默無
所獻爲而天下陰知其有聖德卽位每命近臣必以官
而不以名大臣從容以爲言帝曰朕雖宮中命小臣亦
未嘗以名也一日語神宗曰國家舊制士大夫之子有
尚帝女皆升行以避舅姑之尊義甚無謂朕嘗思此寤
寐不平豈可以富貴之故屈人倫長幼之序也可詔有
司革之會疾不果神宗述其事焉

贊曰昔人有言天之所命人不能違信哉英宗以明哲
之資膺繼統之命執心固讓若將終身而卒踐帝位豈
非天命乎及其臨政臣下有奏必問朝廷故事與古治
所宜每有裁決皆出羣臣意表雖以疾疢不克大有所
爲然使百世之下欽仰高風詠歎至德何其盛也彼隋

晉王廣唐魏王泰窺覷神器矯揉奪嫡遂啓禍原誠何
心哉誠何心哉

入命

宋史卷十三終

宋史卷十四

本紀第十四

開府儀同三司程國錄軍國軍事前書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德聖君春坊右允管國子監司業事臣黃汝良等奉

勅重校刊

神宗一

神宗紹天法古運德建功英文烈武欽仁聖孝皇帝諱
項英宗長子母曰宣仁聖烈皇后高氏慶曆八年四月
戊寅生于濮王宮祥光照室羣鼠吐五色氣成雲八月
賜名仲鍼授率府副率三遷至右千牛衛將軍嘉祐八

萬曆二十七年刊

宋史卷十四

本紀

一

年侍英宗入居慶寧宮嘗夢神人捧之登天英宗卽位授安州觀察使封安國公是年五月壬戌受經于東宮帝隆準龍顏動止皆有常度而天性好學請問至日晏忘食英宗常遣內侍止之帝正衣冠拱手雖大暑未嘗用扇侍講王陶入侍帝率弟顥拜之九月加忠武軍節度使同中書門下平章事封淮陽郡王改今諱治平元年六月進封顥王三年三月納故相向敏中孫女爲夫人十月英宗不豫帝引仁宗故事請兩日一御邇英閣講讀以安人心十二月壬寅立爲皇太子四年正月丁巳英廟崩帝卽皇帝位戊午赦天下常赦所不原者遣

馮行已告哀于遼已未尊皇太后曰太皇太后皇后曰皇太后命宰相韓琦爲山陵使辛酉遣孫坦等告卽位于遼以大行皇帝詔賜夏國主及西蕃唃廝囉丙寅羣臣表三上始御迎陽門幄殿聽政內醫侍先帝疾者皆坐不謹貶之詔東平郡王允弼襄陽郡王允良朝朔望以吳奎終喪復授樞密副使戊辰以韓琦守司空兼侍中曾公亮行門下侍郎兼吏部尚書進封英國公文彥博行尚書左僕射檢校司徒兼中書令富弼改武寧軍節度使進封鄭國公曹佺改昭慶軍節度使檢校太傅張昇改河陽三城節度使宗諤同中書門下平章事改

集慶軍節度使檢校尚書左僕射歐陽脩趙槩並加尚書左丞仍參知政事陳升之爲戶部侍郎呂公弼爲刑部侍郎允弼允良並加守太保弟東陽郡王顥進封昌王鄆國公顥進封樂安郡王羣臣進秩有差二月乙酉初御紫宸殿立向氏爲皇后丁亥詔入內內侍省皇城司合覆奏事並執條覆奏戊子進封交趾郡王李日尊爲南平王加邈川首領董瓊檢校太保詔山陵所須應委三司轉運司計置毋輒擾民詔提舉醫官院試堪診御脉者六人庚寅以四月十日爲同天節辛卯白虹貫

萬曆壬辰詔公主下嫁者行見舅姑禮甲辰西蕃首領搜

羅鉢鳩令結二人誘蕃部二百餘帳投夏國捕獲斬之以狗三月壬子曹佺加檢校太尉兼侍中賜禮部進士及第出身四百六十一人甲寅陝西宣撫使郭達討蕃部党令征等平之賜昌王顥公使錢歲萬緡半給之丙辰昌王顥樂安郡王顥乞解官行服不許癸亥詔入內內侍省官已經壽聖節任子者同天節權罷奏薦壬申歐陽脩知亳州癸酉吳奎參知政事罷乙亥允良薨閏月癸未太白晝見甲申夏國主諒祚遣使謝罪辛卯詔齊密登華頌耀鄜絳潤婆海宿饒歙吉建汀潮等十八州知州慶渭秦延四州通判其選並從中書毋以恩例

奏授乙未張昇以太子太師致仕庚子詔求直言御史
中丞王陶乞許舉知縣資序人爲御史裏行從之癸卯
王安石出知江寧府甲辰詔諸路帥臣及副總管或有
移易依慶曆故事乙巳詔以孟夏農勞之時令監司戒
飭州縣省事勸民力田民有艱食者振之夏四月庚戌
請大行皇帝謚于南郊辛酉詔內外所上封事令張方
平司馬光詳定以聞丙寅錄囚御史中丞王陶侍御史
吳申呂景以過毀大臣陶出陳州申景各罰銅二十斤
吳奎罷知青州遣使循行陝西河北京東京西路體量
安撫壬申奎復位罷州郡歲貢飲食果藥癸酉詔陝西
河東經略轉運司察主兵臣僚怯懦老病者以聞五月
辛巳以久旱命宰臣禱雨乙巳寶文閣成置學士直學
待制官六月己酉遼遣蕭餘慶等來弔祭己未振河北
流民辛未詔天下官吏有能知徭役利病可議寬減者
以聞乙亥詔中書樞密細務歸之有司秋七月庚辰詔
察富民與妃嬪家婚姻夤緣得官者甲申石蕃來貢巳
丑命尚書戶部郎中趙抃刑部郎中陳薦同詳定中外
封事辛卯告英宗憲文肅武宣孝皇帝謚于天地宗廟
社稷壬辰上寶冊于福寧殿丙午文州曲水縣令宇文
之邵上書指陳得失八月丁未朔太白晝見戊午復西

夏和市已巳京師地震癸酉葬英宗于末厚陵九月丁
丑詔減諸路逃田稅額壬午祧僖祖及文懿皇后乙酉
祔英宗神主于太廟樂曰大英之舞戊子減兩京畿內
鄭孟州囚罪一等民役出陵者蠲其賦辛卯徙封顯爲
岐王額爲高密郡王富弼爲尚書左僕射遣孫思恭等
報謝于遼且賀生辰正且壬辰錄周世宗從曾孫貽廓
爲三班奉職甲午遼遣耶律好謀等來賀卽位戊戌以
王安石爲翰林學士辛丑韓琦罷爲司徒鎮安武勝軍
節度使判相州吳奎陳升之罷樞密副使呂公弼爲樞
密使張方平趙抃並參知政事邵亢爲樞密副使壬寅
以曾公亮爲尚書左僕射文彥博爲司空潮州地震癸
卯以權御史中丞司馬光爲翰林學士冬十月丙午漳
泉諸州地震丁未富弼罷判河陽戊申建州邵武興化
軍地震己酉初御邇英閣召侍臣講讀經史以右諫議
大夫權御史中丞滕甫考諸路監司課績張方平以父
憂去位庚戌給陝西轉運司度僧牒令糴穀振霜旱州
縣癸丑詔翰林學士御史中丞侍御史知雜事舉材堪
御史者各二人詔將作監主簿常秩赴闕甲寅製資治
通鑑序賜司馬光癸酉知青澗城种諤復綏州十一月
丁丑詔近臣各舉才行可任使者一人戊寅詔求直言

丙戌詔二府各舉所知丁亥令考院許定諸州所上
縣令治狀戊子分令宰臣祈雪置馬監于河東交城縣
庚寅詔近臣以舉官不當經三劾者中書別奏取旨乙
未詔令內外文武官各舉有材德行能者十二月丙辰
西南龍蕃來貢辛酉以來歲日食正旦自乙丑避殿減
膳罷朝賀壬戌詔起居日增轉對官二人丙寅詔州縣
吏並緣爲姦致獄多瘦死歲終會死者多寡以制其罪
著爲令己巳遼遣蕭傑等來賀正旦

熙寧元年春正月甲戌朔日有食之詔改元丁丑以旱
減天下囚罪一等杖以下釋之壬午令州縣掩暴該丁
亥命宰臣曾公亮等極言闕失庚寅御殿復膳壬辰幸
寺觀祈雨丙申趙槩罷知徐州三司使唐介參知政事
丁酉詔修英宗實錄壬寅增太學生百人二月辛亥令
諸路每季上雨雪乙卯孔若蒙襲封衍聖公壬戌貸河
東饑民粟三月庚辰夏主諒祚卒遣使來告哀丙戌詔
恤刑戊子作太皇太后慶壽宮皇太后寶慈宮丁酉簡
州木連理潭州雨毛夏四月乙巳詔翰林學士王安石
越次入對戊申命宰臣禱雨以樞密直學士李參爲尚
書右丞判西京留守司御史臺辛亥同天節羣臣及遼
使初上壽于紫宸殿五月甲戌募饑民補廂軍庚辰詔

兩制及國子監舉諸王宮學官戊戌廢慶成軍六月癸卯錄唐魏徵狄仁傑後丁未占城來貢辛亥詔諸路興水利乙亥河決棗彊縣丙寅命司馬光滕甫截定國用秋七月癸酉詔謀殺已傷案問欲舉自首者從謀殺減二等乙亥名秦州新築大甘谷口砦曰甘谷城丁丑詔諸路帥臣監司及兩制知雜御史已上各舉武勇謀畧三班使臣二名賜布衣王安國進士及第己卯羣臣三表請上奉元憲道文武仁孝之號不許陳升之知樞密院爭給濮州雷澤縣堯陵守戶壬午以恩冀州河決賜水死家緡錢及下戶粟甲申京師地震乙酉又震大雨辛卯以河朔地大震命沿邊安撫司及雄州刺史候遼人動息以聞賜壓死者緡錢京師地再震壬辰遣御史中丞滕甫知制誥吳克安撫河北癸巳疏深州溢水甲午減河北路囚罪一等丁酉賜河北安撫司空名誥敕募民入粟己亥回鶻來貢八月壬寅詔京東西路存恤河北流民京師地震甲辰又震乙卯賜河東及鄜延路轉運司空名誥募民入粟實邊甲子詔中書門下考屬近行尊者一人壬之丙寅罷宗諤平章事丁卯遣張宗益等賀遼主生辰正旦九月辛未太祖曾孫舒國公從式進封安定郡王丁亥減后妃臣僚薦奏推恩戊子

莫州地震有聲如雷丁酉詔三司裁定宗室月料嫁娶
生日郊禮給賜冬十月辛丑給天下繫囚衣食薪炭乙
卯出奉宸庫珠付河北買馬戊辰禁銷金服飾十一月
癸酉太白晝見癸未命宰臣禱雪丙戌朝饗太廟遂齋
于郊宮廢青城後苑丁亥祀天地于園丘大赦羣臣進
秩有差乙未京師及莫州地震十二月己亥朔命宰臣
禱雪癸卯瀛州地大震庚戌賜夏國主秉常詔許納塞
門安遠二砦歸其綏州辛亥錄唐段秀實後癸丑禱雪
于郊廟社稷庚申以判汝州富弼爲集禧觀使詔乘驛
赴闕壬戌雪甲子遼遣耶律公質等來賀正旦

二年春正月丙午奉安英宗神御于景靈宮英德殿二
月己亥以富弼同中書門下平章事庚子以王安石參
知政事命翰林學士呂公著修英宗實錄乙巳帝以災
變避正殿減膳徹樂甲子陳升之王安石創置三司條
例議行新法三月乙酉詔漕運鹽鐵等官各具財用利
害以聞丙戌命宰臣禱雨戊子秉常上誓表納塞門安
遠二砦乞綏州詔許之乙未以旱慮囚四月丁酉朔羣
臣再上尊號不許戊戌省内外土木工壬寅遼遣耶律
昌等來賀同天節丁未唐介薨臨其喪戊申宰臣富弼
曾公亮以早上表待罪詔不允癸丑命曾公亮爲西京

奉安仁宗英宗御容禮儀使丁巳遣使諸路察農田水利賦役戊午外任大使臣年七十以上令監司體量直除致仕者更不與子孫推恩甲子御殿復膳免河北歸業流民夏稅五月辛未宴紫宸殿初用樂巳卯賜河北役兵特支錢癸未翰林學士鄭獬罷知杭州宣徽北院使王拱辰罷判應天府知制誥錢公輔罷知江寧府丁亥奉安仁宗英宗御容于會聖宮及應天院甲午減西京囚罪一等台州民延贊等九人年各百歲以上並授本州助教六月丁巳右諫議大夫御史中丞呂誨以論王安石罷知鄆州以翰林學士呂公著爲御史中丞命龍圖閣直學士張揆兼編排錄用勳臣子孫壬戌太白晝見秋七月乙丑朔日當食雲陰不見庚午詔御史中丞舉推直官及可兼權御史者甲戌東平郡王允弼薨辛巳立淮浙江湖六路均輸法壬午振恤被水州軍仍蠲竹木稅及酒課癸未詔自今文臣換右職者須實有謀勇曾著績効卽得取旨甲申日下有五色雲巳丑韓琦上仁宗實錄曾公亮上英宗實錄八月癸卯侍御史劉琦貶監處州鹽酒務御史裏行錢顛貶監衢州鹽稅亦以論安石故乙巳殿中侍御史孫昌齡以論新法貶通判蘄州丙午同修起居注范純仁以言事多忤安石

罷同知諫院戊申河徙東行夏國請從舊蕃儀詔許之
巳酉范純仁知河中府甲寅朝神御殿辛酉以秘書省
著作佐郎程顥王子韶並爲太子中允權監察御史裏
行壬戌侍御史知雜事劉述同判刑部丁諷坐受刑名
敕不卽下述貶知江州諷貶通判復州審刑院詳議官
王師元坐言許遵所議刑名不當貶監安州稅九月甲
子朔交州來貢乙丑以古勿峒効順首領儂智會爲右
千牛衛大將軍丁卯立常平給斂法戊辰出內庫緡錢
百萬糴河北常平粟丁丑遣孫固等賀遼主生辰正旦
辛卯廢奉慈殿壬辰以秘書省著作佐郎呂惠卿爲太
子中允崇政殿說書冬十月丙申富弼罷爲武寧軍節
度使判亳州曾公亮陳升之並同中書門下平章事城
綏州命郭逵選將置守具逵遣趙嵩交夏人所納安遠
塞門二砦就定地界夏人渝初盟嵩請城綏州不以易
二砦因改名綏德城戊戌以蕃宮禮賓使折繼世爲忠
州刺史左監門衛將軍鬼名山爲供備庫使仍賜姓名
趙懷順丙辰詔御史請對並許直由閣門上殿戊午宗
諤復平章事巳未夏人來謝封冊辛酉錄楊承信曾孫
立田重進曾孫章爲三班借職十一月乙丑命韓絳制
置三司條例甲戌詔祖宗之後世襲補外官非祖免親

罷賜名授官丙子罷諸路提刑武臣頒農田水利約束
壬午御邇英閣聽講賜汴口役兵錢已丑減天下囚罪
一等徒以下釋之閏月庚子濟御河壬子置交子務是
月差官提舉諸路常平廣惠倉兼管勾農田水利差役
事十二月癸亥朔復減后妃公主及臣僚推恩癸酉增
失入死罪法丙戌增三京留司御史臺國子監及宮觀
官以處卿監監司知州之老者戊子遼遣蕭惟禧來賀
正旦是歲交州來貢

宋史卷十四終

宋史卷十五

本紀第十五

開府儀同三司柱國錄軍國重事前中書省丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

神宗二

三年春正月癸丑錄唐李氏周柴氏後乙卯詔諸路散
青苗錢禁抑配戊午判尚書省張方平罷知陳州二月
壬申以翰林學士司馬光為樞密副使凡九辭詔收還
敕誥甲戌以河州刺史瞎欺丁本征為金紫光祿大夫

萬曆二十七年刊

宋史卷十五

本紀

檢校刑部尚書乙酉韓琦罷河北安撫使爲大名府路
安撫使三月丙申孫覺呂公著張戢程顥李常上疏極
言新法不聽己亥始策進士罷詩賦論三題戊申李常
言青苗斂散不實有旨具析翰林學士兼知通進銀臺
司范鎮封還詔書以爲不當坐罷職守本官壬子賜禮
部奏名進士明經及第八百二十九人乙卯詔諸路毋
有留獄丙辰立試刑法及詳刑官右正言孫覺以奉詔
反覆貶知廣德軍夏四月癸亥幸金明池觀水嬉宴射
瓊林苑丙寅遼遣耶律寬來賀同天節丁卯給兩浙轉
運司度僧牒募民入粟戊辰御史中丞呂公著貶知穎
州己卯趙抃罷知杭州以韓絳參知政事監察御史裏
行程顥罷爲京西路同提點刑獄壬午右正言李常貶
通判滑州監察御史裏行張戢貶知公安縣王子韶貶
知上元縣癸未侍御史知雜事陳襄罷爲同修起居注
程顥簽書鎮寧軍節度判官公事前秀州軍事判官李
定爲太子中允監察御史裏行五月癸巳詔並邊州郡
毋給青苗錢太白晝見壬寅詔令司馬光詳定轉對封
事甲辰詔罷制置三司條例歸中書辛亥賜進士蘇丕
號安退處士壬子罷入閣儀丁巳詔以審官院爲東院
別置西院六月癸酉日有五色雲丁丑封宗室秦魯蔡

魏燕陳越七王後爲公戊寅詔修武成王廟丙戌知諫
院胡宗愈貶通判真州秋七月辛卯歐陽脩徙知蔡州
壬辰呂公弼罷樞密使以知太原府馮京爲樞密副使
置潞州交子務戊戌雨雹癸丑詳定宗室襲封制度甲
寅置三班院主簿八月戊午罷看詳銀臺司文字所丙
寅以旱慮囚死罪以下遞減一等杖笞者釋之以衛州
早令轉運司振恤仍蠲租賦戊寅詔川峽福建廣南七
路官令轉運司立格就注具爲令遣張景憲等賀遼主
生辰正旦巳卯夏人犯大順城知慶州李復圭以方略
授環慶路鈐轄李信慶州東路都巡檢劉甫監押神詠
出戰兵少取敗復圭誣信等違其節制斬信及劉甫神
詠死於獄是月慶州巡檢姚兪斃夏人於荔原堡鈐轄
郭慶都監高敏死之九月戊子朔中書置檢正官乙未
韓絳罷爲陝西宣撫使巳亥始試法官庚子曾公亮罷
爲司空兼侍中河陽三城節度使辛丑以馮京參知政
事翰林學士吳克爲樞密副使乙巳親策賢良方正及
武舉壬子太白晝見癸丑作東西府以居執政司馬光
罷知永興軍詔環慶陣亡義勇餘丁當刺者悉免之冬
十月辛酉詔延州毋納夏使甲子雨水壬申朝謁神
御殿丙子知慶州李復圭擅興兵敗績誣裨將李信劉

甫种詠以死御史劾之貶保靜軍節度副使戊寅陳升之以母憂去位乙酉詔罷諸場務內侍監常十一月戊子振河北饑民徙京西者已丑官節行之士二十一人壬辰蠲陝西蕃部貧糧癸卯授布衣王存下班殿侍三班差使宣撫司指揮使甲辰夏人寇大順城都監燕達等擊走之庚戌詔升朝官除南郊赦封贈父母外不得以加恩轉官乙卯以韓絳兼河東宣撫使梓州路轉運使韓琦等以能興利除害賜帛有差十二月己未詔立諸路更戍法舊以他路兵雜戍者遣還乙丑立保甲法丁卯以韓絳王安石並同中書門下平章事王珪參知

政事賜布衣陳知彥進士出身知縣王輔同進士出身庚午夏人寇鎮戎軍三川砦巡檢趙普伏兵邀擊敗之丁丑增廣南攝官奉戍寅初行免役法賜西蕃董璘詔并衣帶鞍馬庚辰命王安石提舉編修三司令式壬午遼遣蕭遵道等來賀正旦癸未命宋敏求詳定命官使臣過犯是歲振河北陝西旱饑除民租交趾入貢廣源下溪州蠻來附

四年春正月丁亥朔不視朝己丑种諤襲夏兵于囉兀北大敗之遂城囉兀自是夏人日聚兵爲報復計言者以諤爲稔邊患不便壬辰王安石請鬻天下廣惠倉田

爲三路及京東常平倉本從之乙未渝州夷賊李光吉
叛巡檢李宗閔等戰死命夔州路轉運使孫構討平之
詔詳定大辟覆讞法丁酉朝謁太祖太宗神御殿庚子
幸集禧觀宴從臣又幸大相國寺御宣德門觀燈韓絳
等言种諤領兵入西界斬獲甚衆詔遣使撫問乙巳停
括牧地丁未立京東河北賊盜重法庚戌罷永興軍買
鹽鈔場甲寅定文德殿朔望視朝儀二月丁巳朔罷詩
賦及明經諸科以經義論策試進士置京東西陝西河
東河北路學官使之教導辛酉詔治吏沮青苗法者戊
辰詔振河北民乏食者贖恤西界戰死軍人庚午于闐
國來貢壬申進封高密郡王頽爲嘉王癸酉詔審官院
所定人赴中書察堪任者引見甲戌賜討渝州夷賊兵
特支錢丁丑禱雨詔增漳河等役兵三月丁亥夏人陷
撫寧堡戊子慶州廣銳卒叛尋討平之庚寅詔給諸路
學田增教官員辛卯遣使察奉行新法不職者癸卯減
河東陝西路囚罪一等徒以下釋之民緣軍事科役者
蠲其租斌丙午种諤坐陷撫寧堡責授汝州團練使潭
州安置丁未韓絳坐興師敗衄罷以本官知鄧州辛亥
錄唐李氏後夏四月丙辰朔恤刑辛酉遼遣蕭廣等來
賀同天節壬戌遣環慶都鈐轄开贊以兵屯邠涇河中

賦字

以備西夏癸亥罷陝西交子法癸酉司馬光權判西京
留臺種諤再貶賀州別駕甲戌詔司農寺月進諸路所
上雨雪狀丙子遣使按視宿亳等州災傷仍令修飭武
備壬午定進士考轉官五月甲午右諫議大夫呂晦卒
壬寅詔許富弼養疾西京丙午高麗國來貢辛亥詔宗
室率府副率以上遭父母喪及嫡孫承重並解官行服
壬子詔恩冀等州災傷遣使振恤蠲其稅六月丁巳河
北饑民爲盜者減死刺配庚申羣臣三上尊號曰紹天
法古文武仁孝皇帝不許甲子歐陽脩以太子少師致
仕丙寅慮囚甲戌富弼坐格青苗法徙判汝州秋七月
戊子層檀國來貢甲午振恤兩浙水災乙未錄死事將
校崔達子遇爲三班奉職丁酉監察御史裏行劉摯罷
監衡州鹽倉御史中丞楊紘貶知鄭州庚子詔宗室不
得祀祖宗神御丁未詔唐鄧給流民田八月癸丑朔高
麗來貢遣官體量陝西差役新法及民間利害甲寅詔
郡縣保甲與賊鬪死傷者給錢有差庚申復春秋三傳
明經取士癸酉遣楚建中等賀遼主生辰正旦置洮河
安撫司命王韶主之九月丙戌河決鄆州辛卯大饗明
堂以英宗配赦天下內外官進秩有差庚子夏人入貢
癸卯增選人奉冬十月壬子朔罷差役法使民出錢募

役立選人及任子出官試法丙辰置樞密院檢詳官戊辰立太學生內外上舍法丙子詔罪人配流遇冬者至中春乃遣十一月壬午朔詔凡賞功罰罪事可懲勸者月頒之天下甲申詔蠲逋租丁亥作中太一宮壬寅開洪澤河達于淮十二月辛亥朔詔增賜國子監錢四千緡戊午歸夏俘己未安定郡王從式薨甲子封越國公世清爲會稽郡王丙寅省諸路廂軍乙亥崇義公柴詠致仕子若訥襲封丙子遼遣耶律紀等來賀正旦

五年春正月己丑詔聽降羌歸國己亥詔太廟時饗以宗室使相已上攝事置京城邏卒察謗議時政者收罪

之二月壬子龜茲來貢以兩浙水賜穀十萬石振之仍募民興水利壬戌詔罷陝西逆運銅錫癸亥太白晝見丙寅以知鄭州呂公弼爲宣徽南院使判秦州龍圖閣直學士蔡挺爲樞密副使三月甲午李日尊卒子乾德嗣遣使弔贈戊戌富弼以司空致仕進封韓國公立文武換官法丙午以內藏庫錢置市易務夏四月庚戌朔立殿前馬步軍春秋校試殿最法乙卯遼遣耶律適等來賀同天節己未括閑田置弓箭手辛未塞北京決河五月辛巳詔以古渭砦爲安遠軍命王韶兼知軍行教閱法宗室非袒免親者許應舉庚寅以青唐大首領俞

龍珂爲西頭供奉官賜姓名包順壬辰以趙尚寬等前
守唐州辟田疏水有功增秩以勸天下丙午太白晝見
行保馬法六月壬子曾公亮以太傅致仕癸亥詔以四
場試進士丙寅作京城門銅魚符乙亥置武學秋七月
壬寅初以文臣兼樞密都承旨閏月庚戌遣中書檢正
官章惇察訪荆湖北路詔入內供奉官以下已有養子
更養次子爲內侍者斬八月甲申太子少師致仕歐陽
脩薨秦鳳路公邊安撫王韶復武勝軍丁亥詔求歐陽
脩所撰五代史壬辰以武勝軍爲鎮洮軍癸巳遣崔台
符等賀遼主生辰正旦乙未詔侍從及諸路監司各舉

有才行者一人甲辰王韶破木征于鞏令城頒方田均
稅法九月癸丑許宗室試換文資癸亥始御便殿旬校
諸軍武技丙寅少華山崩詔壓死者賜錢貧者官爲葬
祭淮南分東西路冬十月戊戌升鎮洮軍爲熙州鎮洮
軍節度置熙河路減秦鳳囚罪一等十一月癸丑河州
首領瞎藥等來降以爲內殿崇班賜姓名包約丁卯貶
權監察御史裏行張英監荆南稅壬申分陝西爲永興
秦鳳路仍置六路經略司章惇開梅山置安化縣十二
月丙子赦亡命荆湖溪洞者丁丑詔太原置弓箭手戊
寅詔寺觀奉聖祖及祖宗陵寢神御者免役錢改溫成

廟爲祠壬午陳升之爲樞密使癸未雨土乙未築熙州

南北關及諸堡砦己亥遼遣蕭瑜等來賀正旦

六年春正月辛亥復禧祖爲太廟始祖以配感生帝祧
順祖于夾室二月辛卯夏人寇秦州都巡檢使劉惟吉
敗之丙申永昌陵上宮東門火王韶復河州獲木征妻
子壬寅以韓絳知大名府三月己酉詔贈熙河死事將
田瓊禮賓使錄其子三人孫一人庚戌親策進士置經
局命王安石提舉辛亥試明經諸科丙辰以四月朔日
當食自丁巳避殿減膳降天下囚罪一等流以下釋之
己未置諸路學官壬戌賜賜名進士諸科及第出身五

百九十六人甲子交州來貢丁卯宰相上表請復膳不
許詔進士諸科並試明法注官戊辰置刑獄檢法官庚
午封李日尊子乾德爲交趾郡王夏四月甲戌朔日食
不見乙亥御殿復膳西南龍蕃諸夷來貢置律學丁丑
遼遣耶律寧等來賀同天節甲午定齊徐等州保甲戊
戌裁定在京吏祿五月癸卯朔播州楊貴遷遣子光震
來貢以光震爲三班奉職戊申禱雨乙丑詔京東路察
士人有行義者以聞遣中書檢正官熊本措置瀘夷西
京左藏庫副使景思忠等攻燒遂州夷圍戰歿錄其子
昌符等七人軍士死者賜其家錢帛有差辛未西南龍

蕃來貢六月己亥置軍器監秋七月乙巳詔京西淮南
兩浙江西荆湖等六路各置鑄錢監丙午大食陀婆離
來貢己酉禱雨甲寅錄在京囚死罪以下降一等杖罪
釋之丁巳詔沿邊吏殺熟戶以邀賞者戮之乙丑分河
北爲東西路丙寅夜西北有聲如磬八月壬申朔遣賈
昌衡等賀遼主生辰正旦甲申罷簡州歲貢綿紬甲午
賜熙河涇原軍士特支錢戊戌復比閭族黨之法九月
壬寅置兩浙和糴倉立斂散法戊申詔興水利辛亥策
武舉戊午岷州首領木令征以其城降王韶入岷州丙
寅太白犯斗戊辰詔禱雨決獄冬十月辛未章惇平懿
洽州蠻辛巳以復熙河洮岷疊宕等州御紫宸殿受羣
臣賀解所服玉帶賜安石甲申朝獻景靈宮丙戌振兩
浙江淮饑壬辰行折二錢丁酉遣使瘞熙河戰骨十一
月癸丑中太一宮戒減天下囚罪一等流以下釋之乙
卯親祀太一宮丙寅大雪詔京畿收養老弱凍餒者十
二月戊子詔決開封府囚丙申遼遣耶律洞等來賀正
旦
七年春正月辛亥賞復岷洮等州功西京左藏庫使桑
湜等遷官有差壬子幸中太一宮宴從臣又幸大相國
寺御宣德門觀燈乙卯封皇子俊爲永國公甲子熊本

平瀘夷二月辛未于闐來貢發常平米振河陽饑民癸未詔三司歲會天下財用出入之數以聞巳丑禱雨辛卯置客省引進四方館閣門使副等員乙未知河州景思立等與青宜結鬼章戰于踏白城敗死廢遼州三月壬寅木征鬼章寇岷州高遵裕遣包順等擊走之慮囚減死罪一等杖以下釋之癸卯以旱避殿減膳乙巳白虹貫日丙午遣使分行諸路募武士赴熙河庚戌詔熙河死事者家給錢有差罷兩浙增額預置紬絹令諸路監司察留獄癸丑羣臣表請復膳不許丙辰遼遣林牙蕭禧來言河東疆界命太常少卿劉忱議之巳未行方

田法甲子遣使報聘于遼乙丑詔以災異求直言夏四月癸酉以旱罷方田是日雨遼遣耶律朮寧等來賀同天節乙亥王韶破西蕃於結河川丙子御殿復膳巳卯以高遵裕爲岷州團練使甲申詔邊兵死事無子孫者廩其親屬終身乙酉王韶進築珂諾城與蕃兵連戰破之斬首七千餘級焚三萬餘帳木征率酋長八十餘人詣軍門降雨雹丙戌王安石罷知江寧府以韓絳同中書門下平章事監修國史翰林學士呂惠卿參知政事置沅州丁酉詔王韶發木征及其家赴闕遼遣樞密副使蕭素議疆界于代州境上五月戊戌朔減熙河路囚

罪一等流以下釋之辛丑詔河州瘞蕃部暴骸壬寅雨
雹癸卯大雨雹辛亥罷賢良方正等科乙丑大雨水壞
陝平陸二縣六月戊寅賜討洮州將士特支錢丁亥作
渾儀浮漏廣州鳳皇見以木征爲榮州團練使賜姓名
趙思忠秋七月癸卯羣臣五上尊號曰紹天憲古文武
仁孝皇帝不許癸亥詔河北兩路捕蝗又詔開府淮南
提點提舉司檢覆蝗旱以米十五萬石振河北西路災
傷八月丁丑賜環慶安撫司度僧牒以募粟振漢蕃饑
民遣張芻等賀遼主生辰正旦辛卯詔免淮南開封府
來年春夫除放邢洛等州秋稅癸巳置場於南薰安上
門給流民米集賢院學士宋敏求上編修閣門儀制九
月戊戌以時雨降詔河北京西陝西淮南等路勸民趨
耕有因事拘繫者釋之壬子三司火癸丑置京畿河北
京東西路三十七將甲寅詔樞密院議邊防冬十月壬
申詔韓琦富弼文彥博曾公亮條代北事宜以聞戊寅
詔浙西路提舉司出米振常潤州饑庚辰置三司會計
司以韓絳提舉辛巳以河北災傷減州軍文武官員癸
巳以常平米於淮南西路易饑民所掘蝗種又振河北
東路流民十一月己未祀天地于園丘赦天下十二月
丙寅省熙河岷三州官百四十一員丁卯文武官加恩

已丑遼遣耶律寧等來賀正旦是歲高麗入貢濟井長寧夷十郡及武都夷內附

八年春正月庚子蔡挺罷判南京留司御史臺馮京罷知亳州丙午分京東爲東西路輟江南東路上供米均給災傷州軍丁未御宣德門觀燈乙卯詔出使廷臣所至采吏治能否以聞雨木冰戊午詔所在流民願歸業者州縣齎遣之己未洮西安撫司以歲旱請爲粥以食羌戶饑者二月甲子增陝西錢監改鑄大錢癸酉以王安石同中書門下平章事戊寅詔樞密副都承旨張誠一等以李靖營陣法教殿前馬步軍乙酉初行河北戶

馬法丙戌停京畿土功七年三月丁酉振潤州饑戊戌知河州鮮于師中乞置蕃學教蕃酋子弟賜田十頃歲給錢千緡增解進士二人從之庚子遼蕭禧再來遣韓縝往河東會議癸丑知制誥沈括報聘復振常潤饑民戊午太白晝見夏四月乙丑詔減將作監冗官丁卯遼遣耶律景熙等來賀同天節乙亥正禧祖禘祫東嚮位戊寅以吳克爲樞密使壬午湖南江水溢閏月乙未陳升之罷爲鎮江軍節度使判揚州廣源州劉紀寇邕州歸化州儂智會敗之壬寅沈括上奉元曆癸卯以宣徽北院使張方平判未興軍分秦鳳路兵爲四將壬子沂

州民朱唐告前餘姚縣主簿李逢謀反辭連右羽林大將軍世居及河中府觀察推官徐革命御史中丞鄧綰知諫院范百祿御史徐禧雜治之獄具世居賜死逢革等伏誅甲寅錄趙普後乙卯詔西南蕃五姓蠻五年一入貢五月辛酉朔慮囚降死罪一等杖以下釋之甲子分環慶兵爲四將丁丑雨土及黃毛甲申熙河路蕃官殿直頓埋謀叛伏誅己丑遣使振鄜延環慶饑六月乙未日上有五色雲丙午醴泝水入蔡河以通漕己酉頒王安石詩書周禮義于學官辛亥以安石爲尚書左僕射兼門下侍郎戊午太師魏國公韓琦薨己未以琦配

饗英宗廟庭秋七月甲子處州江水溢戊寅太白晝見戊子分涇原兵爲五將命韓縝如河東割地八月庚寅朔日當食雲陰不見癸巳募民捕蝗易粟苗損者償之仍復其賦丙申遣謝景温等賀遼主生辰正旦減官戶役錢之半詔發運司體實淮南江東兩浙米價州縣所存上供米毋過百萬石減直予民斗錢勿過八十庚戌韓絳罷發河北京東兵及監牧卒修都城丁巳大閱九月庚申朔王安石兼修國史立武舉絕倫法冬十月庚寅呂惠卿罷知陳州乙未葺出軫己亥詔以災異數見不御前殿減常膳求直言壬寅赦天下罷手實法丁未

彗不見丙辰御殿復膳十一月戊寅交趾陷欽州壬午
立陝西蕃丁法甲申交趾陷廉州丙戌渝州改南平軍
十二月丙申濬河壬寅以翰林學士元絳參知政事龍
圖閣直學士曾孝寬簽書樞密院事辛亥天章閣待制
趙高爲安南道招討使嘉州防禦使李憲副之以討交
趾癸丑遼遣耶律世通等來賀正旦甲寅熙河路木宗
域首領結彪謀叛熟羌日脚族青廝扒斬其首來獻補
下班殿侍

九年春正月乙丑雨木冰戊辰交趾陷邕州知州蘇緘
死之己卯下溪州刺史彭師晏及天賜州降庚辰遣使
祭南嶽南海告以南伐辛巳贈蘇緘奉國軍節度使諡
忠勇以其子子元爲西頭供奉官閣門祇候二月戊子
宣徽南院使郭逵爲安南道招討使罷李憲以趙高副
之詔占城占臘合擊交趾己丑宗哥首領鬼章寇五牟
谷蕃官藺壇訥支等邀擊大破之己亥以出師罷春宴
乙卯雨雹三月丙辰朔進仁宗婉容周氏爲妃辛酉御
集英殿策進士恤欽廉邕三州死事家瘞戰亡士賊所
蹂踐除其田征甲戌賜進士諸科及第出身五百九十
六人丁丑以廣西進士徐伯祥爲右侍禁欽廉白州巡
檢宗哥首領鬼章寇五牟谷熙河鈐轄韓存寶敗之庚

辰以种諤知岷州夏四月辛卯遼遣耶律庶幾等來賀
同天節乙未以遼主母喪罷同天節上壽戊戌復廣濟
河漕癸卯詔廣南亡沒士卒及百姓爲賊殘破者轉運
安撫司具實并議振恤以聞甲辰給空名告身付安南
以招降賞功詔諸路募武勇赴廣西贈廣西死事將士
官有差丙午遣王苑臣等弔慰于遼辛亥茂州夷寇邊
遣內副押班王中正經制甲寅遼遣耶律孝淳以國母
喪來告帝發哀成服輟視朝七日五月丙辰朔詔邕州
沿邊州峒首領來降者周惠之癸亥試諸醫學士內寅
分兩浙爲東西路丁卯城茂州壬申詔安南諸軍過嶺
有疾者所至護治丙子大理國來貢庚辰靜州下首領
董整白等來降六月丁亥詔安南將吏視軍士有疾者
月以數聞己丑綿州都監王慶崔昭用劉珪左侍禁張
又援戰茂州死之詔慶等子與借職女出嫁夫與奉職
白丁王禹錫等二人賜錢其家辛卯詔濱海富民得養
蠶戶毋致爲外夷所誘己亥慮囚降死罪一等杖以下
釋之癸卯以水源等洞蠻主儂賀等七人爲定遠寧遠
將軍秋七月丙辰朱崖軍黎賊黃嬰入寇詔廣南西路
嚴兵備之庚申關以西蝗蝻蚩蚘生壬戌築下溪州改
名會溪城癸亥靜州將楊文緒結蕃部謀叛王中正斬

之以徇詔廣西死事官無子孫者許立後乙丑詔自今
遇大禮推恩官昭憲太后族一人是月安南行營次桂
州郭達遣鈐轄和斌等督水軍涉海自廣東入諸軍自
廣南入八月甲申朔齊州監務左班殿直孫紀死賊錄
其一子爲三班借職戊子以文彥博守太保兼侍中行
太原尹己丑遣程師孟等賀遼主生辰正旦罷鬻祠廟
錢丁酉禁北邊民闌出穀粟庚子占城來貢九月戊午
濬汴河丙寅詔罷都大制置河北河防水利司己卯遼
遣使回謝詔恤嶺南死事家表將士墓冬十月乙酉太
白晝見乙未詔東南諸路教閱新軍丙午王安石罷判

江寧府以吳克監修國史王珪爲集賢殿大學士並同
中書門下平章事資政殿學士馮京知樞密院辛亥除
放沅州歸明人戶去年倚閣秋稅十一月乙卯賜廣南
東路空名告敕募入錢助軍辛酉錄唐相魏徵後嗣州
司士參軍道嚴流內銓特免試注官乙亥以安南行營
將士疾疫遣同知太常禮院王存禱南嶽遣中使建祈
福道場己卯洮東安撫司言包順等破鬼章兵於多移
谷壬午鬼章寇岷州知州种諤等敗之鐵城十二月丙
戌安南僞觀察使劉紀降置司農丞庚寅子傭生丁酉
詔岷州界經鬼章兵燹者賜錢脅從來歸者釋其罪癸

卯郭逵敗交趾於富良注獲其僞太子洪真李乾德遣人奉表詣軍門降逵遂班師丁未遼遣耶律運等來賀正旦庚戌詔有得鬼章冷鷄朴首者賞之置威戎軍十年春正月乙丑御宣德門觀燈戊辰仙韶院火不視朝己巳白虹貫日二月甲申以崇信軍節度使宗旦同中書門下平章事戊子以鬼章敗种諤等賞官有差辛卯日中有黑子甲子詔宗室使相雖及十年更不取旨磨勘丁酉詔諸州歲以十一月給老疾貧乏者粟盡三月乃止己亥以王韶知洪州丙午以復廣源蘇茂等州羣臣表賀赦廣州囚罪一等徒以下釋之賜行營諸軍錢民緣征役者恤其家以廣源州爲順州赦李乾德罪以郭逵判潭州趙高知桂州己酉以交趾降赦廣南東路荆湖南路繫囚餘各降一等徒以下釋之三月辛未慮囚降死罪一等杖以下釋之壬申詔州縣捕蝗夏四月辛巳復置憲州乙酉遼遣蕭儀等賀同天節癸巳文州蕃賊寇邊州兵擊走之丁酉賜熙河路兵特支錢戰死者賜帛免夏秋稅五月戊午詔修仁宗英宗史甲戌太白晝見六月壬午注輦國朝貢癸巳王安石以使相爲集禧觀使丁未置泯州鐵城堡秋七月甲寅禱雨丁巳令諸路歲上縣令課績辛酉羣臣五上尊號曰奉天

天憲古文武仁孝皇帝不許乙亥郭遠以安南失律貶
爲左衛將軍丙子河決澶州曹村埽八月壬寅詔潭州
置將及增武臣一員遣蘇頌等賀遼主生辰正旦甲辰
詔侍從臺諫監司各舉文臣有才行者一人九月庚戌
詔河決害民田所屬州縣疏濬仍蠲其稅老幼疾病者
振之乙卯詔諸傳宣內批面諭事無法守並從中書樞
密覆奏其所恩澤規免罪者劾之辛酉詔鎮戎德順軍
各置都監一員癸酉立義倉甲戌宗樸兼侍中封濮陽
郡王冬十月戊寅朔宗樸薨癸巳昭化軍節度使宗誼
封濮國公詔濮王子以次襲封奉祀戊戌太子太師張

昇卒十一月庚午以西蕃邈川首領董璘都首領青宜
結鬼章爲廓州刺史阿令骨爲松州刺史甲戌祀天地
于圜丘赦天下十二月丁丑朔占城國獻馴象壬午詔
改明年爲元豐甲申以郊祀文武官加恩丁亥封子傭
爲均國公辛丑遼遣耶律孝淳等來賀正旦

元豐元年春正月乙卯以王安石爲尚書左僕射舒國
公集禧觀使戊午命詳定郊廟禮儀詔減陳留捧日天
武等軍刺員庚申御宣德門召從臣觀燈乙丑以太皇
太后疾驛召天下醫者閏月辛巳以翰林侍讀學士竇
文閣學士提點中太一宮呂公著兼端明殿學士己丑

詔贈尚書令韓琦依趙普故事壬辰樞密直學士孫固
同知樞密院事己亥太傅兼侍中曾公亮薨庚子日中
有黑子癸卯以公亮配饗英宗廟庭二月庚戌濮國公
宗誼薨甲寅以邕州觀察使宗暉爲淮康軍節度使封
濮國公戊辰詔赦安南戰棹都監楊從先等仍論功行
賞三月辛巳慮囚降死罪一等杖以下釋之御邇英閣
沈季長進講周禮八法癸未詔內外文武官各舉堪應
武舉一人廣南西路經略司乞教閱峒丁從之乙未御
崇政殿閱諸軍辰沅徭賊寇邊州兵擊走之夏四月己
酉遼遣耶律永寧等來賀同天節丙辰詔增置兩浙路
提舉官庚申詔除九經外餘書不得出界癸亥太白晝
見乙丑封號國公宗諤爲豫章郡王戊辰塞曹村決河
名其埽曰靈平五月甲戌朔賜塞河役死家錢乙亥詔
試中刑法官以次推恩六月癸卯朔日有食之乙巳詔
以靈平功遷太常博士苗師中等各一官秋七月癸酉
朔命西上閣門使忠州團練使韓存寶經制瀘州納溪
夷己亥詔齊州預備水災辛丑夔州言甘露降八月癸
卯西邊將訥兒溫祿尊謀反伏誅丁未詔河北被水者
蠲其租甲寅遣黃履等賀遼主生辰正旦戊午以韓絳
爲建雄軍節度使己巳詔濱棣滄三州被水民以常平

糧貸之庚午詔青齊淄三州給流民食九月癸酉交趾
來貢癸未李乾德表乞還廣源等州詔不許乙酉以端
明殿學士呂公著樞密直學士薛向並同知樞密院事
詔祀天地及配帝並用特牲是月武康軍嘉禾生河中
府甘露降冬十月庚戌定秋試諸軍賞格待禁件全死
事錄其弟宣爲三班借職辛亥韓存寶破瀘夷後城十
有三圍癸亥于闐來貢十一月己丑命龍圖閣直學士
宋敏求等詳定正旦御殿儀注癸巳辰州徭賊叛詔沅
州兵討之巳亥罷文武功臣號是月梁縣嘉禾生十二
月丙午日中有黑子九十二日辛亥錄囚降死罪一等

杖以下釋之丙辰詔青州民王贊以復父讐免死刺配
鄰州戊午置大理寺獄巳未詔罷都大提舉在京諸司
庫務司甲子以婉容邢氏爲賢妃詔罷三司推勘公事
官減軍器監勾當公事審官東院流內銓及將作監三
班院主簿左右軍巡判官丙寅遼遣耶律隆等來賀正
旦

二年春正月乙亥罷岢嵐火山軍市馬丙子詔立高麗
交易法壬午以容州管内觀察使上柱國南陽郡開國
公楊遂爲寧遠軍節度使癸未詔知沅州謝麟督捕徭
賊甲申御宣德門觀燈丁亥詔以經義論試宗室甲午

京兆府學教授蔣夔乞以十哲從祀孔子從之詔辰州
叙浦縣置龍潭堡是月潁州壽州甘露降二月甲寅詔
瘞漢州暴骸日中有黑子乙卯以瀘州夷乞弟犯邊詔
王光祖等討之丙辰詔定解鹽歲額乙丑滄州饑發倉
粟振之三月庚午朔董璫遣使來貢辛未詔給地葬畿
內寄菽之喪無所歸者官瘞之庚辰親試禮部進士壬
午試特奏名進士及武舉癸未試諸科明法賜董璫緡
錢銀帛對衣金帶等物丙戌詔雄州兩輸戶南徙者諭
令復業庚寅疏汴洛夏四月辛丑幸金明池觀水嬉宴
射瓊林苑甲辰遼遣蕭晟等來賀同天節丁巳陳升之
以檢校太尉依前同中書門下平章事鎮江軍節度使
上柱國秀國公致仕己未陳升之卒癸亥定正旦御殿
儀甲子詔增審刑院詳議詳斷官罷刑部校法官是月
南康軍甘露降眉州生瑞竹五月丙子順州蠻叛峒兵
討平之庚辰詔以濮安懿王三夫人並稱王夫人祔濮
國辛巳太子太師致仕趙槩上所集諫林甲申元絳罷
知亳州乙酉詔安南軍死事孤寡廩給之戊子御史中
丞蔡確參知政事六月甲辰廣西捕斬儂智春執其妻
子以獻戊申命蔡確參定編修傳法寶錄癸丑詔五路
帥臣副總管軍臣僚各舉任將領及大使臣者二人甲

寅清汴成辛酉詔鎮寧軍節度使魏國公宗懿追封舒
王是月南康軍甘露降忠州雨豆秋七月甲戌張方平
以太子少師致仕戊寅詳定朝會儀己卯命中書句考
四方詔獄庚辰以淮康軍節度使宗暉同中書門下平
章事丁亥詳定郊廟禮儀是月陳州芝草生南賓縣雨
豆瓊州甘露降八月丙申朔夏人寇綏德城都監李浦
敗之辛丑分涇原路兵爲十一將壬寅復八作司爲東
西兩司各置監官文臣一員武臣二員遣李清臣等賀
遼主生辰正旦甲寅詔增太學生舍爲八十齋齋三十
人外舍生二千人內舍生三百人月一私試歲一公試

補內舍生間歲一舍試補上舍生以潁州爲順昌軍節
度是月曹州生瑞穀河陽生芝草九月癸未降順昌軍
囚罪一等徒以下釋之甲申西南龍蕃來貢丁亥大宴
集英殿己丑進婕妤朱氏爲昭容壬辰出馬步射格鬪
法頒諸軍甲午西南羅蕃方蕃來貢冬十月丙申西南
石蕃來貢癸卯置籍田令詔立水居船戶五戶至十戶
爲一甲戊申交趾歸所掠民詔以順州賜之己酉太皇
太后疾上不視事庚戌罷朝謁景靈宮命輔臣禱于天
地宗廟社稷減天下囚死罪一等流以下釋之乙卯太
皇太后崩戊午詔易太皇太皇園陵曰山陵辛酉以羣

臣七上表始聽政命王珪爲山陵使十一月癸未始御
崇政殿丁亥雨土十二月乙巳御史中丞李定上國子
監敕式令并學令凡百四十條丙午復置御史六察庚
申遼遣蕭寧等來賀正旦是月全州芝草生桂州甘露
降

宋史卷十五終

宋史卷十六

本紀第十六

開府儀同三司上柱國錄軍國軍事前中書右丞相監修國史領經筵事都總裁脫脫等脩

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

神宗三

三年春正月乙丑朔以大行太皇太后在殯不視朝癸
酉陞許州爲潁昌府丙子降潁昌囚罪一等徒以下釋
之戊寅上太皇太后諡曰慈聖光獻戊子詔審刑院刑
部斷議官失入者歲具數罰之己丑高麗國遣使來貢

萬曆二十七年刊

宋史卷十六

本紀

一

二

白虹貫日辛卯于闐國大首領阿令顛顛溫等來貢癸
巳白虹貫日二月丙午以翰林學士章惇參知政事丙
辰始御崇政殿視朝丁巳命輔臣禱雨三月乙丑工部
侍郎同平章事吳充罷爲觀文殿大學士西太一宮使
癸酉葬慈聖光獻皇后于永昭陵丙子南丹州入貢以
刺史印賜之乙酉祔慈聖光獻皇后神主于太廟戊子
降兩京河陽囚罪一等民緣山陵役者蠲其賦己丑以
慈聖光獻皇后弟昭德軍節度使曹佺爲司徒兼中書
令改護國軍節度使餘親屬加恩有差夏四月乙未觀
文殿大學士吳充薨丁酉封宗暉爲濮陽郡王以安懿
王子孫皆進官一等己亥遼遣耶律永芳等來賀同天
節乙巳以瀘州夷乞弟侵擾詔邊將討之戊申乞弟寇
戎州兵官王宣等戰歿甲寅罷羣牧行司復置提舉買
馬監牧司乙卯令御史分案諸路監司庚申詔御史臺
六察以糾劾多寡爲殿最任滿取旨升黜辛酉增國子
監歲賜錢六千緡五月乙丑詔自今三伏內五日一御
前殿辛巳以穎昌進士劉堂上制盜十策授徐州蕭縣
尉甲申復命韓存寶經制瀘夷詔改都大提舉導洛通
汴司爲都提舉汴河堤岸司是月青州臨朐益都石化
爲麩六月甲午日有五色雲戊戌詔省宗室教授存十

三員丙午詔中書詳定官制罷兵部勾當公事官詔河北河東陝西路各選文武官一員提舉義勇保甲壬子詔罷中書門下省主判官歸其事於中書是月安州臨江軍產芝及連理麥秋七月庚午河決澶州甲戌詔自今遇大禮罷上尊號癸未彗出太微垣丙戌避殿減膳詔求直言丁亥罷羣神從祀明堂戊子太白晝見八月乙巳罷省寺監官領空名者癸丑遣王存等賀遼主生辰正旦戊午彗不見九月壬戌增宣祖定州東安墳地二十頃及守園戶丙寅御殿復膳乙亥正官名以開府儀同三司易中書令侍中同平章事特進易左右僕射自是以下至承務郎易祕書省校書郎正字將作監主簿有差檢校僕射以下及階散憲銜並罷詳在職官志辛巳大響明堂以英宗配赦天下癸未薛向孫固並爲樞密副使乙酉詔卽景靈宮作十一殿以時王禮祀祖宗以王安石爲特進改封荆國公丙戌進封岐王顥爲雍王嘉王顥爲曹王並爲司空文彥博爲太尉封曹佺爲濟陽郡王宗旦爲華陰郡王馮京爲樞密使薛向罷知潁州丁亥以呂公著爲樞密副使閏九月乙卯加文彥博河東永興軍節度使以富弼爲司徒十一月己丑朔日當食雲陰不見十二月甲辰遼遣蕭偉等來賀正

旦

四年春正月乙未命步軍都虞候林廣代韓存寶經制
瀘夷庚子詔試進士加律義辛亥于闐來貢馮京罷知
河陽孫固知樞密院龍圖閣直學士韓縝同知樞密院
事二月辛未置秦州鑄錢監已卯分東南團結諸軍爲
十三將三月乙未詔在京官毋舉辟執政有服親癸卯
章惇罷知蔡州甲辰以翰林學士張璪叅知政事乙巳
命官閱九軍營陳法於京城南戊申大閱丙辰董璲遣
使來貢夏四月癸亥遼遣耶律祐等來賀同天節御延
和殿閱試保甲已巳詔罷南郊合祭天地自今親祀北
郊如南郊儀有故不行則以上公攝事壬申慮囚山陰
縣主簿余行之謀反伏誅乙酉河決澶州小吳埽五月
丁酉詔河東路提點刑獄劉定專振被水民戊申封晉
程嬰爲成信侯公孫杵臼爲忠智侯立廟于絳州六月
戊午河北諸郡蝗生癸未命提點開封府界諸縣公事
楊景略提舉開封府界常平等事王得臣督諸縣捕蝗
秋七月己丑太白晝見庚寅西邊守臣言夏人囚其主
秉常詔陝西河東路討之甲午鄜延涇原環慶熙河麟
府路各賜金銀帶綿襖銀器鞍轡象笏甲辰韓存寶坐
逗留無功伏誅丁未大軍進攻米脂砦已酉詔會鞏充

史館修撰專典史事詔內外官司舉官悉罷令大理卿
崔台符同尚書吏部審官東西三班院議選格八月乙
卯朔罷中書堂選悉歸有司丙辰詔蠲河北東路災傷
州軍今年夏料役錢辛酉夏人寇臨州堡詔董氈會兵
伐之以金州刺史燕達爲武康軍節度使己巳復置滑
州丁丑熙河經制李憲敗夏人于西市新城獲酋首三
人首領二十餘人庚辰又襲破于女遮谷斬獲甚衆辛
巳司馬光趙彥若上所修百官公卿年表十卷宗室世
表三卷九月乙酉董氈遣使來貢且言己遣首領洛施
軍馬喬阿八公等將兵三萬會擊夏國李憲復蘭州古城
戊子蘭州新順首領巴令謁等三族率所部兵攻夏人
撒捕宗城敗之己亥王珪上國朝會要壬寅閱河北保
甲于崇政殿官其優者三十六人甲辰詳定郊廟奉祀
禮儀丙午詔諭夏主左右并嵬名部族諸郡首領並許
自歸戊申太白犯斗庚戌夏兵救米脂砦鄜延經畧副
使种諤率衆擊破之辛亥种諤又敗夏人于無定川十
月丁巳米脂砦降己未拂菻國來貢庚申熙河兵至女
遮谷與夏人遇戰敗之乙丑涇原兵至磨哆隘遇夏人
與其統軍梁大五戰敗之追奔二十里斬大首領沒囉
臥沙監軍使梁格鬼等十五級獲首領統軍姪訖多埋

等二十二人已入銀州庚午環慶行營經略使高遵
裕復通遠軍种諤遣曲珍等領兵通黑水安定堡路遇
夏人與戰破之斬獲甚衆癸酉復韋州乙亥李憲敗夏
人于屈吳山下丑曲珍與夏人戰于蒲桃山敗之戊寅
种諤入貢州詔諸將存撫降人辛巳史館修撰曾鞏乞
收采名臣高士事迹遺文詔從之涇原節制王中正入
宥州十一月癸未朔日有食之丁亥諸軍合攻靈州种
諤敗夏人于黑水己丑李憲敗夏人于囉逋川辛卯种
諤降橫河平人戶破石堡城斬獲甚衆辛丑師還癸卯
种諤至夏州索家平兵衆三萬人以無食而潰丙午高
遵裕以師還夏人來追遂潰十二月辛未林黃破乞弟
于納江乙亥慈聖光獻皇后禫祭宰臣王珪等上表請
聽樂不許自是五表乃從之戊寅遼遣蕭福全等來賀
正旦

五年春正月癸未朔不受朝丙申御宣德門觀燈己亥
白虹貫日庚子責授高遵裕郢州團練副使本州安置
乙巳作新渾儀浮漏辛亥詔再議西討以熙河經制李
憲爲涇原熙河蘭會安撫制置使李浩權安撫副使二
月癸丑朔頒三省樞密六曹條制詔鄜延軍士病不能
歸者賜其家絹十匹丙辰以乞弟平班師辛酉詔董氈

首領結隣死者朝辭物給其子董訥支蘭氈贈賜絹百匹癸亥華陰郡王宗旦薨丁卯封武昌軍節度觀察留後宗惠爲江夏郡王癸酉以出師赦梓州路減囚罪一等民緣軍事役者蠲其賦封董氈爲武威郡王丙子渤泥來貢三月壬辰親策進士甲午策武舉己亥以日當食避殿減膳赦天下降死罪一等流以下原之詔杭州歲脩吳越王墳廟壬寅廊延路副總管曲珍敗夏人于金湯乙巳賜進士諸科出身千四百二十八人丙午雨土夏四月壬子朔日食不見甲寅御殿復膳丁巳遼遣平永端等來賀同天節己未沈括奏遣曲珍將兵綏德城應援討葭蘆塞左右見聚羌落詔從之乙丑以直龍圖閣徐禧知制誥權御史中丞癸酉官制成以王珪爲尚書左僕射兼門下侍郎蔡確爲尚書右僕射兼中書侍郎甲戌太中大夫章惇爲門下侍郎張璪爲中書侍郎翰林學士蒲宗孟爲尚書左丞翰林學士王安禮爲尚書右丞錄唐段秀實後復其家丁丑同知樞密院呂公著罷知定州五月辛巳朔行官制丁亥賞平蠻將士有差癸巳豐州卒張世矩等亂伏誅其黨王安以母老詔特原之作尚書省戊戌詔兩省官人舉可任御史者各二人甲辰遣給事中徐禧治廊延邊事六月辛

亥朔環慶經略司遣將與夏人戰破之斬其統軍嵬名
姝精嵬副統軍訛勃遇甲寅王珪上兩朝史戊午詔修
兩朝實訓詔以成都路供給瀘州邊事曲赦免二稅甲
子改翰林醫官院爲醫官局壬申交趾獻馴犀二癸酉
豫章郡王宗諤薨戊寅曲珍等敗夏人于明堂川作天
源河秋七月辛巳廣西經略司言知宜州王奇與賊戰
敗績壬午詔罷大理寺官赴中書省讞案戊子詔御史
中丞舒亶舉任言事或察官十人辛卯詔尚書考功員
外郎蔡京編手詔庚子以蔡京爲起居郎仍同詳定官
制丁未垂拱殿宴修史官己酉始建雩壇祀上帝以太
宗配八月庚戌朔封御侍武氏爲才人壬子進封均國公
傭爲延安郡王以昭容朱氏爲賢妃庚申帝有疾詔歲
以四孟月朝獻景靈宮辛未遣韓忠彥等賀遼主生辰
正旦鳳州團練使种諤以行軍迂道降授文州刺史壬
申詔罷增減幕職州縣官奉甲戌城未樂戊寅河決原
武九月丁亥夏人三十萬衆寇未樂曲珍戰不利裨將
寇偉等死之夏人遂圍城己丑帝以疾愈降京畿囚罪
一等徒以下釋之壬辰遣使行視畿縣民被水患者乙
未詔張世矩等將兵救未樂砦戊戌未樂陷給事中徐
禧內侍李舜舉陝西轉運判官李稷死之己亥詔客省

引進四方館東西上閣門各置使副等職庚子安化蠻寇宜州知州王奇死之詔贈忠州防禦使辛丑賞董瓊將士有差癸卯滑州河水溢冬十月辛亥洛口廣武大河溢甲寅知延州沈括以措置乖方責授均州團練副使隨州安置鄜延路副都總管曲珍以城陷敗走降授皇城使丙辰脩定景靈宮儀乙丑詔贈永樂死事臣徐禧金紫光祿大夫吏部尚書李舜舉昭化軍節度使並賜諡忠愍李稷朝奉大夫工部侍郎入內高品張禹勤皇城使各推恩賜贈有差癸酉貶知太原府資政殿大學士呂惠卿知單州十一月戊寅朔罷御史察諸路壬

午景靈宮成告遷祖宗神御癸未初行酌獻禮乙酉以奉安神御赦天下官與享大臣子若孫一人庚寅紫宸殿宴侍祠官十二月丁巳新樂成以賢妃周氏爲德妃辛酉塞原武決河丙寅休日御延和殿引進對官十人辛未西南龍蕃來貢壬申遼遣耶律儀等來賀正旦丙子錄永樂死事將皇城使寇偉等十三人及東上閣門副使景思誼等九十人有差

六年春正月丁丑朔御大慶殿受朝始用新樂儀鸞司徹幕屋壞毀玉輅甲申白虹貫日丁亥朝獻景靈宮己丑層檀入貢庚寅御宣德門觀燈癸巳詔御史六察罷

上下半年更易法乙未詔修周漢以來陵廟乙巳御崇政殿閱武士丙午封楚三閭大夫屈平爲忠潔侯二月丁未夏人數十萬衆攻蘭州鈐轄王文郁率死士七百餘人擊走之丙辰以夏人犯蘭州貶興河經略使李憲爲經略安撫都總管以王文郁爲西上閭門使知蘭州副使李浩爲四方館使甲子詔供備庫使高遵治西京左藏庫副使張壽各降一官三月辛卯夏人寇蘭州副總管李浩以衛城有功復隴州團練使乙未休日御延和殿引進對官八人丙申河東將薛義敗夏人于葭蘆西嶺戊戌以檢校太尉上柱國太原郡開國公王拱辰

爲武安軍節度使麟府州將郭忠詔等敗夏人于乜離抑部詔行賞有差巳亥河東將高永翼敗夏人于真卿流部夏四月巳酉朝獻景靈宮辛亥遼遣蕭固等來賀同天節甲子禮部郎中林希上兩朝實訓李浩敗夏人于巴義谿辛未雨壬申御邇英閣蔡卞進講周禮五月丙子朔于闐入貢甲申以時暑趣決開封大理獄庚寅以旱慮囚甲午夏人寇蘭州右侍禁韋定死之癸卯詔賜資州孝子支漸粟帛是月夏人寇麟州知州訾虎敗之六月乙巳朔詔御史臺六察各置御史一員癸丑詔御史中丞兩省官各舉可任言事或監察御史五入

閏月乙亥朔夏主秉常請修貢許之戊寅詔陝西河東
毋輒出兵丙戌詔内外文武各舉應武舉一人汴水溢
丙申太師守司徒韓國公富弼薨諡文忠秋七月乙卯
祔孝惠孝章淑德章懷皇后于廟丙辰以四后祔廟降
京畿囚罪一等流以下原之孫固罷知河陽以同知樞
密院韓縝知樞密院戶部尚書安燾同知樞密院戊午
朝獻景靈宮八月丙子賜升祔陪祠官宴于尚書省巳
卯太白晝見乙酉遣蔡京等賀遼主生辰正旦辛卯蒲
宗孟罷王安禮爲尚書左丞吏部尚書李清臣爲尚書
右丞九月癸卯朔日有食之冬十月癸酉朔秉常遣使
上表請復修職貢乞還舊疆戊子封孟軻爲鄒國公癸
巳會稽郡王世清薨庚子尚書省成辛丑封馬援爲忠
顯王十二月癸卯加上仁宗諡曰體天法道極功全德
神文聖武睿哲明孝皇帝英宗曰體乾應曆隆功盛德
憲文肅武睿神宣孝皇帝甲辰朝獻景靈宮乙巳朝享
太廟丙午祀昊上帝于園丘赦天下甲寅文彥博以太
師致仕乙卯以觀文殿大學士韓絳爲建雄軍節度使
庚申辛尚書省官執政五服內未仕者一人進尚書以
下官一等

七年春正月丙午封洛州防禦使世準爲安定郡王癸

丑夏人寇蘭州李憲等擊走之甲寅以賢妃朱氏爲德妃二月甲戌太師文彥博入覲置酒垂拱殿癸未進封濮陽郡王宗暉爲嗣濮王封宗晟爲高密郡王宗綽爲建安郡王宗隱爲安康郡王宗瑗爲漢東郡王宗愈爲華原郡王三月辛丑賜文彥博宴于瓊林苑帝製詩以賜之庚申御崇政殿大閱壬戌詔賜鬼章寫經紙還其所獻馬癸亥白虹貫日夏四月辛未大食國來貢乙亥遼遣蕭浹等來賀同天節丁丑賜饒州童子朱天錫五經出身丙戌景靈宮天元殿門生芝草六本壬辰朝獻景靈宮癸巳夏人寇延州安塞堡將官呂真敗之五月壬子慮囚降死罪一等杖以下釋之辛酉白虹貫日壬戌以孟軻配食文宣王封荀況楊雄韓愈爲伯並從祀詔諸路帥臣監司等舉大使臣爲將領六月丙子夏人寇德順軍巡檢王友死之辛卯江夏郡王宗惠薨秋七月甲辰伊洛溢河決元城丙午遣使振恤賜溺死者家錢壬子朝獻景靈宮甲寅王安禮罷八月庚午詔王光祖遣人招諭乞弟許出降免罪補官是歲乞弟死辛巳遣陳睦等賀遼主生辰正旦九月壬寅西南龍蕃來貢乙巳三佛齊來貢乙丑夏人圍定西城熙河將秦貴敗之冬十月乙亥夏人寇熙河庚辰饒州童子朱天申對

于睿思殿賜五經出身辛巳朝獻景靈宮戊子詔分畫
交趾界以六縣二峒賜之乙未夏人寇靜邊砦涇原將
彭孫敗之十一月丁酉朔寇清邊砦隊將白玉李貴死
之甲辰夏國主秉常遣使來貢乙卯太白晝見十二月
戊辰端明殿學士司馬光上資治通鑑以光爲資政殿
學士降詔獎諭庚寅詔門下中書外省官同舉言事御
史辛卯遼遣耶律襄等來賀正旦是歲河東饑河北水
壞洛州廬舍蠲其稅

八年春正月戊戌帝不豫甲辰赦天下乙巳命輔臣代
禱景靈宮乙卯分遣羣臣禱于天地宗廟社稷二月辛
巳開寶寺貢院火丁亥命禮部鎖試別所癸巳上疾甚
遷御福寧殿三省樞密院入見請立皇太子及請皇太
后權同聽政許之三月甲午朔立延安郡王傭爲皇太
子賜名煦皇太后權同處分軍國事乙未赦天下遣官
告于天地宗廟社稷諸陵丁酉皇太后命吏部尚書曾
孝寬爲冊立皇太子禮儀使戊戌上崩于福寧殿年三
十有八皇太子卽皇帝位尊皇太后爲太皇太后皇后
爲皇太后德妃朱氏爲皇太妃太皇太后權同處分軍
國事九月己亥上大行皇帝諡曰英文烈武聖孝皇帝
廟號神宗十月乙酉葬于永裕陵

贊曰帝天性孝友其入事兩宮必侍立終日雖寒暑不
變嘗與岐嘉二王讀書東宮侍講王陶講論經史輒相
率拜之由是中外翕然稱賢其卽位也小心謙抑敬畏
輔相求直言察民隱恤孤獨養耆老振匱乏不治宮室
不事遊幸厲精圖治將大有爲未幾王安石入相安石
爲人悻悻自信知祖宗志吞幽薊靈武而數敗兵帝奮
然將雪數世之耻未有所當遂以偏見曲學起而乘之
青苗保甲均輸市易水利之法旣立而天下洶洶騷動
慟哭流涕者接踵而至帝終不覺悟方斷然廢逐元老
擯斥諫士行之不疑卒致祖宗之良法美意變壞幾盡
自是邪佞日進人心日離禍亂日起惜哉

宋史卷十六終

宋史卷十六

本朝

十四

48-11322

